

GO LEBELELA GO JESU

 ...go tšwa Beibeleng ya Modimo. Go tsebeng se, gore ge mantšu a ka a šitwa, a Gagwe a ka se ke. Kafao ke nyaka go bala le—le Lengwalo go tšwa go puku ya Jesaya. Gomme ke na le Mangwalo a rilego a ngwadilwego ntle mo, le ditshwayo di se kae tše ke nyakago go di bolela, ka pela ka mo go kgonegago, gomme morago ke ye thwi ka gare go ba le thapelo bakeng sa balwetši gape, bošegong bjo.

² Ke nyaka go tšeа sebakabotse se, ge re sa phetla go Jesaya 45, ke nyaka go tšeа sebakabotse se go leboga badiredi bohole bao ba šomišanegommogo ka kopanong ye.

³ Ngwanešu Shores, mogwera morategi kudu wa ka, o emela Assemblies of God, fa ka toropongkgolo. Ngwanešu Outlaw, mogwera yo mongwe yo bohlokwa wa ka, go tšwa go Jesus Name Church. Ngwanešu Fuller, go tšwa go Indipendence, mogwera yo mongwe yo bohlokwa wa ka. E sego feela monna ba bararo ba, ba emela dihlopha tše tharo tše kgolo, eupša badiredi ba bangwe bao ke ba diretšego, ka go a pele, a masolo a mangwe, bohole ba dirišane le go tla mmogo, gomme batho ba tšwetše ntle. Ka kgonthe ke a tshepa, baena ba ka, gore bontši bja batho ba lena, bao ba bego ba babja le go hloka, ba hweditše thušo lebakeng la nako ye. Gomme ke na le nnete gore ke lekile tšohle ke tsebilego mokgwa wa go dira, gomme ke na le nnete Moya wo Mokgethwa o tla tiišetša se se boletšwego le go dirwa.

⁴ Kafao, Morena a le šegofatše bjale ge re lebelela go Beibele. Jesaya 45, go thoma ka ya 22 tem- . . . , goba, temana ya 22.

Lebelelang go nna, gomme le phološwe, magomo ohle a lefase: gobane Ke nna Modimo, gomme ga go yo mongwe gape.

Ke enne ka nnamong, lentšu le tšwile molomong wa ka ka toko, gomme le ka se bowe, Gore go nna letolo le lengwe le le lengwe le tla kobega, gomme leleme le lengwe le le lengwe le tla araba.

⁵ Ke a tseba seo ga se go bala mo gontši ga Lengwalo, eupša le lekanetše ka gore Ke la ka Gosafelego. Ke Lentšu la Modimo. Gomme ge nka bitša se sehlogo bjale, lebaka la e ka ba metsotsyo ye masomepedi, goba masometharo, ke tla rata go re, ke nyaka go re: *Go Lebelela Go Jesu*.

⁶ Yeo e bile pitšo lebaka la mengwaga, “Lebelelang go Nna, lena magomo a lefase.” Ke tla rata mohuta wa go retolla yeo feela gannyane nthatana, gomme, “Lebelelang ka go ikgetha go Nna mafelelong a tshepedišo ye nngwe le ye nngwe ya lefase,” gobane ka mehla O itira Yenamong go tsebja kgonthe kudu mo bofelong

bja tshepedišo ya lefase ge e etla bofelong bja yona. “Lebelelang go Nna, lena magomo ohle a lefase,” nka no bolela. Lengwalo le re, “Magomo, magomo a lefase,” magomo a ka bontši, “magomo a lefase.”

⁷ Ba bantši ba re, “Re kwele se lebaka la mengwaga ye mentši, ‘Lebelelang go Nna. Lebelelang go Nna.’” Gabotse, yeo ke therešo. Eupša selo, potšišo ke, ke a o bona eng ge o lebelela? Le kgopetšwe seo nako ye telele, “Lebelelang go Nna.”

⁸ O kwa batho ba re, “Lebelela.” Ge ba bolela lentšu lebelela, go ra, “go fa šedi, go lebelela godimo, goba go lebelela go, le go lebelela ntle.”

⁹ Gomme bjale Modimo o re fa, “Lebelelang go Nna. Ke nna Modimo, gomme ga go yo mongwe.”

¹⁰ Gomme ke a makala, ka nako ye re phelago ka go yona bjale, re ka kgona go lebelela eng seo se tla bago go tia kudu go feta Modimo? Gomme Modimo ke Lentšu, kafao lebelelang go Lentšu la Modimo, lehono, bakeng sa karabo ya lena. Beibele e na le karabo ya letšatši le. E bile le yona bakeng sa matšatši a mangwe. E na le yona go ya go ile, gobane ke Kriste wa go swana maabane, lehono, le go ya go ile.

¹¹ Beibele e na le karabo, gobane Beibele ke kutollo ya Jesu Kriste, e utollwa ge e sa le go tloga go theweng ga lefase. O utolotšwe ka sebopego sa baprofeta, O utolotšwe ka sebopego sa dikgoši, O utolotšwe ka sebopego sa bafamolao, gobane seo ke se A lego sona: Kgoši, Moprefeta, Mofi wa Molao, le Modimo.

Bjale, O rile, “Lebelelang go Nna.”

¹² Gomme o re, “Ke dirile seo.” Go ya le gore o lebeletše eng, e beakanya se o se lebelelago, ke kae le se o Mo lebelelego bakeng sa sona. O lebeletše eng? Ke morero ofe o nago le wona go lebeleleng go Yena? Go ya feela ka se o lebelelago bakeng sa sona, seo ke se o se hwetšago.

¹³ Ka mehla, batho ba tla kopanong, kopano ya bodumedi, ba bangwe ba bona ba ya go hwetša lešaba le legolo la batho go dula le lona. Ba bangwe . . . Oo, ke hloya go bolela se, eupša ke therešo. Ba bangwe ba ya kerekeng go no laetša diaparo tša bona tše ba di aperego. Ba bangwe ba ya kerekeng gobane ba re, “Ye ke kereke ye kgolokgolo ka toropongkgolo; goba e-e na le leina le lekaonekaone; legoro le le itšego la batho le ya kerekeng ye,” gona yeo—yeo ke phošo. Le a bona? Ga se wa lebelela go selo sa maleba seo kereke e hlomilwego bakeng sa sona.

Modimo o rile, “Lebelelang go Nna.”

¹⁴ Batho ba bantši ba ya ditirelong gomme go no bonwa. Gomme dinako tše dingwe batho ba ya ditirelong . . . Se ke se sebe kudu go bolela se, gomme re ka kgona go dikadika go sona nako ye telele. Eupša ba ya kerekeng ka monagano wa bona o šetše o phethilwe pele ba eya. Ge dilo tše di itšego di boletšwe, goba se

sengwe feela kgahlanong le kgopolو ya bona, ba tla emeleta thwi gomme ba tšwela ka ntle. Gabonolo ba no se eme, gobane ba ne kgopolو ya bona beng se se swanetšego go ba.

¹⁵ Ke lona lebaka leo Jesu a sego a kwešišwa ge A tlie lefaseng. Ge feela ba ka be ba lebeletše ka go Lentšu la Modimo, sebakeng sa motlwae wa bona—wa bona wa letšatši lela, ba ka be ba tsebile O be a le Morwa wa Modimo. Gobane, Beibele e boletše pepeneneng go tla ga Gagwe ga botlalo, gomme O tlie ka kutollo ya go tlala ya Lentšu.

¹⁶ Gomme moloko wo mongwe le wo mongwe o Mo utolla ka go kutollo ya go tlala yeo e abetšwego nako yeo.

¹⁷ Moloko wo o swanetše go utolla Jesu Kriste. Yeo ke kutollo ya Gagwe yeo e tshepišitšwego ka go Lentšu, e swanetše go utollwa go moloko wo. Ge dikereke di ka se Le amogelete, yo mongwe o tla tsoga le go Le dira.

¹⁸ Gobane, Johane o rile, “Modimo o kgona go tsošetša Abraham bana ka matlapa a. O se nagane go bolela ka teng ga gagomong, ‘Re na le Abraham go tatagorena,’ gobane Modimo o kgona go tsošetša Abraham bana ka matlapa a.”

¹⁹ “Ka gore se Modimo a se boletšego, Modimo o kgona ka botlalo go dira se A tshepišitšego go se dira. Tate wa rena Abraham o lemogile seo, gomme kgahlanong le kholofelo o dumetše go kholofelo; gomme a se tekateke go tshepišo ya Modimo ka gosedumele; eupša o be a tiile, a efa tumišo go Modimo, gobane Modimo o mo diretše tshepišo.”

²⁰ O re diretše tshepišo ya letšatši le. O re diretše tshepišo. Gomme tshepišo ya rena lehono e no ba kgontha go utollwa bjalo ka ge e bile go Abraham, gobane re bana ba Abraham, “Go beng go hwa ka go Kriste, re Peu ya Abraham, le bajabohwa le Yena go ya ka tshepišo.”

²¹ Batho ba bantši kudu ba tlie ka gare, ba thala kgopolو ya bona, ba dula ka kopanong ya Ebangedi ya go Tlala, goba kopano e ka ba efe ye nngwe, gomme ba tla no leta feela dinakwana di se kae go fihla se sengwe se boletšwe seo ba sa dumelanelego le sona, morago ba emeleta le go tšwa. Ba no se dule go kwa gape. Ba ne... Ba no se dule go bona ge eba go be go le, le se Therešo ya sona e lego.

²² Bjale re re, “A woo ke moy? Wola o tšwa kae?” Ka mehla o bile gona. Woo o tšwa go Genesi. O bile go theoga go kgabola Lengwalo. Makga a mantši... .

²³ Ge Paulo a be a bolela nako ye nngwe, a ke re, go sehlopha sa batho, gobaneng, ba—ba mo theeditše sekgauswi ge feela a dutše ka go molao. Eupša ge a thoma go bolela ka kutollo, pono ya Legodimo, ka pela e fetotše phuthego. Ba emeletše, go goelela. Ge ba ka be ba ile ba no theetša se monna a se boletšego, o be a utolla Therešo ya Modimo, ka Lentšu.

²⁴ Nako ye nngwe ya go feta, ka toropongkgolo ye kgolo, ka United States ye, ke be ke laleditšwe bakeng sa tsošeletšo. Feela batho ba se nene—ba se bakae fale bao ba ttilego. Go molaleng, ka go tsošeletšo yohle, go be go se go feta ka mo go lego thwi ka moagong wo bošegong bjo. Gomme ke naganne, “Gabotse, ke tla fa di—di difihlolo, difihlolo tša tuutšea.” Gomme ke tšere moneelo wa lerato wa ka go dira difihlolo tša tuutšea go ba bangwe ba badumedi ba mohlakanelwa fale ka toropongkgolo, le go ba botša go “Tla ntle, ke tla rata go bolela le bona le go ba botša morero wa ka go beng fale: go thuša toropokgolo, go thuša balwetši, go ba thuša, kereke ye nngwe le ye nngwe.”

²⁵ Go lokile, mosong woo, ge Ngaka Lee Vayle e be e le seboledi sa ka lesolong, o ntsebišitše go ba—ba batheeletši, ka morago ga difihlolo, gomme ke tšere se—sehlogo se, “Ke šitilwe go se obamela pono ya Legodimo.” Feela mo nakwaneng, ke hlokometše modiredi o lebeletše sešupanako sa gagwe, o obeleditše godimo gomme a kgothula hlogo ya gagwe go moisa yo mongwe, a emeleta gomme a ya ntle. Pele ke bolela mantšu a tshela goba a seswai, go nyakile tee tharo ya sehlopha sel a bodiredi e sepeletše ntle. Pele nka ba le metsotso ye mehlano ya go bolela feela se Paulo a se boletšego, gore yena “ga se a šitwa go obamele pono ya Legodimo,” gobane Modimo o be a mmileditše go mošomo wo, ba bone thwi nako yeo moo ke bego ke eya go thea kgopolu ya ka. Go be go se ka godimo ga tee tharo ya sehlopha e šetšego. Bjale seo ebile ga se go fa kelohloko ya Bokriste, bjalo ka monna yo a ka bitšago Leina la Jesu Kriste.

²⁶ Ke bolela se ka ditlhompho, eupša ke se bolela go nwelela ka gare. Ke bile le kwešišo ye ntši, le kopanelo ye kaonana, le sehlopha sa dingakabaloi tša Afrika go feta ka mo ke dirilego sehlopha sel a badiredi mosong wola. Ba fa kelohloko ye ntši go Lentšu la Modimo, gomme ba botšiša dipotšišo, bakeng sa... gore nka kgona go ba fa kholoфelo ye e letšego ka go nna, bakeng sa kholoфelo ya Bophelo bjo Bosafelego.

²⁷ Badiredi ba ga se ba be le nako ya Bjona le gatee. Feela ka pela, ka pela ge o ka bolela se sengwe, ba tla ya ntle. Gomme kafao ke ka tsela ye go lego. Ba na le monagano wa bona o phethilwe, ba no dula botelele bjoo, gomme ke sohle ba nyakago go se tseba. Ge le ganetšana Lentšu le letee le selo e ka ba sefe sa lefeela seo ba dumelago go sona, ga ba kgone go dula le go theetša ka Lona. Ke ka baka leo ba sego ba kgona go dumela Jesu Kriste go go batameleng ga Gagwe ga pele. Ke ka baka leo ba tla Mo fošago ka go la Bobedi.

²⁸ Ba a Mo foša nako le nako. Ka mehla ba dirile. Gomme O ikutolotše Yenamong ka go Moshe, o ikutolotše Yenamong ka go Noage, o ikutolotše Yenamoong ka go Eliya, baprofeta bohole, ba e fošitše nako le nako. Jesu o rile, “Ke ofe wa botataweno a sego a bea baprofeta ka mabitleng ntle fale ao ba a kgabišago bjale?”

Yeo ke therešo. Ka mehla e bile therešo. Ke therešo go le bjalo le lehono.

²⁹ Gomme, efela, ka bogareng bja sohle se, re laelwa go lebelela. “Lebelelang Yena, magomo ohle a lefase.”

³⁰ Dinako tše dingwe ba tla ka gare, monna o tla go ahlola ka ke mohuta mang wa diaparo. Ge o sa apare diaparo tša bodiredi, le go ya pele, gona seo se tšwele, ba ka se be le selo go dira le wena. Dinako tše dingwe ba nyaka go lebelela go bona ke mohuta ofe wa thuto o nago le yona, ge o bolela mantšu a gago gabotse, ge o ema ka go nepagala, ka fao o šomišago maina le mašala.

³¹ Gabotse, ga ke tsebe leina goba lešala ke lefe. Ga kgone go le botša. Kafao, seo, seo se tšwele, go nna, gomme ke—ke no se tsebe. Ke be ke sa kgone go dira phapano gare ga leina le lešala. Ke dirile ge ke be ke le ka sekolong, eupša ke lebetše seo kgale kudu.

³² Ke no tseba selo se tee, gomme yoo ke Jesu Kriste ka maatleng a tsogo ya Gagwe, seo ke sohle ke tsebago mokgwa wa go bolela ka sona. Mahlaodi le mašala, ga ke tsebe selo. Gomme ke nagana gore seo ke se bohole re se tletšego mmogo ka dikopanong ka mokgwa wo, ke go Mo tseba; e sego go tseba maina le mašala, eupša go Mo tseba, Jesu Kriste, ka maatleng a tsogo ya Gagwe.

³³ Bjale, batho ba bangwe, ge ba lebelela go Jesu, ba a lebelela gomme ba Mmona, ba lebelela e go Mo lebelela, gomme, ka gona ba a Mmona, ba bona ka go Yena feela mothomi wa kereke, goba m—m—m mmeakanyi wa kereke, goba mohlolomongwe thu—thu thutotumelo bakeng sa kereke. Seo ke se batho ba bantši ba lebelelago go Jesu go se bona. O no ba thutotumelo ye mpsha ye e okeditšwego go thuto ya kgale. Bjale batho ba bantši ba a lebelela le go Mmona ka mokgwa woo.

³⁴ Ba bangwe ba a lebelela le go Mmona bjalo ka nonwane, Santa Claus. Goba, ba bangwe ba bona ba lebelela go Yena bjalo ka tiro tsoko ya histori yeo Modimo a e dirilego mengwaga ye mentši ya go feta. Ba bangwe ba bona ba lebelela go Yena go le bjalo bjalo ka lesaea ka legopong.

³⁵ Eupša, potšišo ke, le bona eng ge le Mo lebelela? A le bona motho wa bobedi wa thrinithi, goba a le bona thrinithi, ba bararo ka go yo Motee? O tla Mmona feela ge o Mo lebelela ka Lentšu. Yeo ke tsela e nnoši o E tsebago, gobane Yena ke Lentšu. Le tla utolla Yenamong. Go ya le gore o lebeletše eng.

³⁶ Ge o lebelela go Yena, go nganga, gona o lebeletše phošo. Ga se A ke a nganga. Go be go se gwa Mo swanelo go nganga.

³⁷ Elelwang, le Mmona ge le Mo lebelela ka Lentšu la Gagwe, le go Mo lemoga. Bjale o ka se kgone go Mmona go fihla mahlo a gago a bulegile go ntlha. Monna ba babedi ba ka kgona go lebelela go Lengwalo la go swana gomme ba se dumelane; yo

motee wa bona o swanetše go rereša, gomme yo mongwe yo motee a be phošo.

³⁸ Dinako tše dingwe go na le dilo tše di diregago go re dikologa, tše re sa kgonego go di kwešiša; ba bangwe ba re ga ba bone dilo, ba bangwe ga ba bone selo ka yona.

³⁹ Lebelelang Dothane tlase kua, letšatši lela ge Eliya a be a dikaneditšwe ke sešole sa Basiria. Gomme mohlanka wa gagwe wa go botega, Gehasi, yo a phetšego le yena, o mo letile, a mo apeela, gomme a boloka diaparo tša gagwe di hlwekile, a tšhela meetse diatleng tša gagwe; o be a na le yena thwi, mosegare le bošego, o mo theeditše a ruta le go rera. Gomme mosong wola ge a tsogile, o lebeletše ntle gomme o bone sešole sa Basiria gohle go dikologa; o rile, “Tate wa ka, mmalo, lebelela kganetšo ye re nago nayo, sešole ka moka sa Basiria!”

⁴⁰ Le a bona, Eliya, ge a tsogile, le go lebelela, o bone se sengwe seo Gehasi a sega a se bona. Gomme kafao o rapetše, “Modimo, bula mahlo a lesogana le.” Bjale, mahlo a gagwe a be a bulegile go phatlalala, eupša o rile, “Bula mahlo a gagwe, gore a ke a bone.” Gomme ge mahlo a gagwe, semoyeng, a bulega, dithaba ka moka di be di tletše dikoloi tša Mollo le Barongwa gohle go dikologa moprofeta yola. Le a bona, go be go fapanā ge mahlo a gagwe a bulegile.

⁴¹ Bjale, batho ba lebelela Lentšu, ka nnete, gomme yeo ke tsela ye o swanetšego go Le lebelela, eupša Le ipega Lonamong bobedi ka kgonthe le semoyeng. Moya o dira Lentšu go phela go tshepišo. Ka mantšu a mangwe, Ke Peu, Moya o fa Bophelo bja Lona. O a maatlafatša, O Le fa go tloga ga Lona—ga Lona, boka pula e efa go peu yeo e bolokilwego ka mobung. E phatlogela pele, Bophelo. Gomme ge o lebelela Jesu bjalo ka Lentšu le le tshepišitšwego la iri, gona e tla utollwa go wena. Ge o Mo lebelela, o tla bona gore O a swana maabane, lehono, le go ya go ile, Kriste wa go swana.

⁴² Karolo ya Lentšu la Modimo e abetšwe moloko wo mongwe le wo mongwe, tsela yohle go tloga go Genesi. Modimo ka mehla o romela yo mongwe. Ka mehla bokereke bo Le dira le hlakahlahkane bjalo go fihla le le ka go metlwae, le go ya pele, bjalo ka ge go bile ka go tleng ga Jesu, gomme morago Modimo o romela moprofeta mmogo. “Lentšu la Morena le tla go moprofeta,” o a Le utolla. A kgatlwa ka maswika go iša lehung, goba a bewa ntle, a ragelwa ntle; gomme nako yeo, morago ga ge a sepetše lebakana, ba aga lebitla la gagwe gomme ba re o be a le monna yo mogolo. Ba phela mo moriting wa se a bego a le sona morago kua, gomme ba gana Lentšu le kgatlampana lehono.

⁴³ Go no swana le motho: ka mehla o bolela ka fao Modimo a lego yo mogolo le se A se dirilego, ka fao dilo tše A yago go di dira, gomme e sega go bona dilo tše A di dirago thwi bjale. Le a bona? O Mo lebelela ka go histori, o Mo lebelela ka go seprofeto,

eupša o lebala gore O dira go swana gonabjale bjalo ka ge A dirile nako yela. Seo se no ba ka go motho, go le bjalo.

⁴⁴ Re hlokometše barutiwa, nako ye nngwe, morago ga... Gabotse, e bile moso wa mathomo wa Paseka. A moso! Jesu, a tsogile go tšwa bahung, a sepela magareng ga matšoba. Gomme bagwera ba babedi, Kleopa le yo mongwe wa bagwera ba gagwe, ba be ba le tseleng go theogela Emause. Gomme ba be ba sepela mmogo ba bolela, ba nyamile ka pelong ya bona. Gomme Monna o gatetše ka ntle ga sethokgwa, gomme a sepela le bona letšatši ka moka, a bolela le bona ka Kriste. Gomme mantšiboa ao, ba Mo kgopetše. O dirile mo o ka rego O be a eya go ba feta kgauswi, eupša ba Mo kgopetše go tla ka gare. O dirile.

⁴⁵ Gomme, ge A dirile, O dirile se sengwe fale ka tsela ye A se dirilego pele ga papolo ya Gagwe le tsogo ya Gagwe. Pele A bapolwa, ba Mmone a e dira feela boka A dirile. Ba ile ba lemoga gore e be e le Yena, le ge ba bile le Yena letšatši lohle botelele gomme ga se ba tsoge ba lemoga gore O be a le Mang.

⁴⁶ Go a kgonega, lehono, gore monna wa go loka, monna yo mokaone, o sepela le Kriste, a bala Lentšu la Gagwe, gomme go le bjalo ga a lemoge gore ye ke iri yeo dilo tše di itšego tša Beibebe ye di swanetše go phethagatšwa. Ke iri ye re phelago ka go yona, nako e batametše ge dilo tše di swanetše go dirwa. Go ngwadilwe, gomme kafao go swanetše go phethagatšwa gobane Modimo o e tshepišitše. Ee, mahlo a rena a swanetše go bulega go bona Lentšu. Bjale, o ka kgona go lebelela Lentšu...

⁴⁷ Bafarisei ba bile le Lentšu lela le thadilwe feela tlwa ka tsela ye Mesia a bego a etla. Ba dumetše ba be ba rereša. Gomme šo O belegwe le go sepela thwi magareng ga bona, gomme ba Mo ahlotše; ge A ba boditše, “Lena puruputšang Mangwalo, ka gore ka go Wona le nagana le na le Bophelo bjo Bosafelego, gomme Ke Wona a pakago ka Nna.”

“Puruputšang Mangwalo.”

Ba rile, “Re barutiwa ba Moshe.”

⁴⁸ O rile, “Ge le ka be le le barutiwa ba Moshe, le be le tla Ntseba, ka gore Moshe o ngwadile ka Nna.”

⁴⁹ Gomme O dirile. Moshe o rile, “Morena Modimo wa lena o tla tsoša Moprefeta boka nna, mofi wa molao, le go ya pele, le Moprefeta, gomme Yena batho ba tla mo kwa.”

⁵⁰ Le a bona, ge nkabe ba tsebile mongwalo wa Moshe, ba ka be ba Mo tsebile. Ba naganne ba tsebile mongwalo wa Moshe, eupša, le a bona, ga se ba o tseba. Le a bona, ba be ba foufaditšwe go yona ntsha yeo.

⁵¹ Kafao feela mantšu a se makae go tšwa go Yena, ka mokgwa woo, ba dirile eng? Ba tabogetše godimo gomme ba rile, “Monna yo o ne diabolo. O tla go re ruta? O tšwa sekolong sefe? Ga re ne

rekoto ya Gagwe. Ke a makala ke karata ya mang ya kopanelo A e swerego?" Goba, se sengwe ka mokgwa woo e be e le potšišo.

⁵² Eupša ba šitilwe go lebelela le go bona gore yena Modimo yoo a tshepištšego Lentšu o be a le hlatsela thwi fao ka Motho yola wa Jesu Kriste, ka gore O be a le Seetša sa iri. O be a le Seetša go batho go sepela ka go sona. Gomme, Lentšu le nnoši la Modimo le tšweletša Seetša. Lentšu la Modimo le nnoši le tšweletša Seetša.

⁵³ Lentšu la Modimo le tšweletša phadimo ya letšatši. Lentšu la Modimo le tšweletša lefase. Lentšu la Modimo le tšweletša moyo. Se sengwe le se sengwe ke Lentšu la Modimo le dirilwe go bonagala, se sengwe le se sengwe seo se nago kgonthe go sona.

⁵⁴ Ge A be a le mo, O rile, "Ke nna Modimo, gomme ntle le Nna ga go yo mongwe."

Ba bangwe ba lebeletše. A re tšeeng ba bangwe bao ba lebeletšego.

⁵⁵ Jesaya, nako ye nngwe, moprofeta yo moswa... Fa nako ya go feta ka Phoenix, ke boletše ka yena, go-go borakgwebo, ke a dumela e be e le. Ka fao a bego a itshamile thata godimo ga legetla la kgoši, Usia, gomme re hwetša gore Usia o ile a ikgogomoša gohle gomme o ile a otlwa ka lephera. Ka gona Jesaya o ile a swanela go ya tlase tempeleng le go rapela, le go re, go ipolela go ba modiradibe. Gomme o bone Bakerubi ba etla pele, ka diphego tša bona ba khupeditše difahlego tša bona, le maoto, le go fofa ka diphego, le go goelela, "Mokgethwa ke Morena Modimo." Ge Jesaya a bile le go getsola Jesu Kriste, sese se a se bonego. Ga se nke a bona motho e ka ba ofe feela wa mehleng. Ga se nke a bona rafilosofi.

⁵⁶ Bjalo ka ge bontši bja dikereke tša rena tša Protestant lehono, ke nagana ke masometshela seswai goba masomeseswai tshela a phesente ya bona, ka go phatišišo, ba ganne go dumela. Ba gana tswalo ya kgarebe ya Jesu Kriste; bareri ba rena ba Protestant. Yeo ke nnete. Ye e tšwa go dipalopalo. Thwi go theoga, ba gana tswalo ya kgarebe. Ga ba dumele gabotse e be e le kgarebe. Kafao, nako yeo, Jesaya ga se a bona se sengwe boka seo. Ba bangwe ba bona, ba rile, "O be a le Monna wa go loka." Ba bangwe ba bona, go swana le tše dingwe tša dikerekemaina tša rena lehono, di rile, "Yena ke Monna wa go loka. Nnete, ga go phošo ka go Yena, eupša, ke a le botša, Mantšu a Gagwe a ka se kgone go hlongwa goba go dumelwa lehono."

⁵⁷ Gabotse, go dumela e ka ba gofe le tumelo e ka ba efe yeo e hlomilwego ka ntle ga Lentšu la Modimo, e tlogele e nnoši. Jesu o rile, "Lentšu la motho yo mongwe le yo mongwe le tla šitwa, eupša la Ka le ka se ke. Magodimo le lefase di tla feta, eupša Lentšu la Ka le ka se tsoge la feta."

⁵⁸ Kafao, kagona, thutotumelo e ka ba efe goba e ka ba eng yeo e sa agiwago go Lentšu le la Modimo, Lentšu lohle la Modimo! Jesu o rile, "Motho a ka se phele ka borotho feela, eupša ka

Lentšu le lengwe le le lengwe.” E sego feela Lentšu *fa* le Lentšu *fale*, le selo se sennyane fa le fale, gomme ba Le bea mmogo; eupša, “Lentšu le lengwe le le lengwe le le tšwago molomong wa Modimo!” Motho o tla tsea Lentšu le lengwe le le lengwe la Beibele! A Le bea mmogo... Le šetše le le mmogo; e no Le bala gomme o Le dumele, dira godimo ga Lona, Modimo o tla Le hlompha.

⁵⁹ Bjale re hwetša gore, Jesaya, ge a lebeletše. O bone eng, Jesaya? O bone Yena a bitšwago, “Moeletši, Mokgoma wa Khutšo, Modimo yo maatla, Tate wa gosafelego.” Seo ke se a se lebeletšego.

⁶⁰ Ge nka bitša monna yo mongwe, Daniele, nako ye nngwe o bile le sebakabotse go Mmona. Moprefeta yo mogolo, o bone eng? O rile, “Ke bone Letlapa, le kgomotšwe thabeng, ntle le diatla, gomme Le tokologetše ka go mebušo ya lefase le go e pšhatlaganya ditshetlana, gomme ya phepheulwa bjalo ka mooko godimo ga seboa sa go fola sa selemo. Gomme Letlapa la gola go ba thaba ye kgolo ye ya go khupetša lefase lohle.” Seo ke se a se boletšego ka Yena.

⁶¹ Kagona, O tla buša lefase, letšatši le lengwe. Batho ba a katana lehono bakeng sa mmuši wa lefase; setšhaba se sengwe le se sengwe se nyaka leleme la bona, dikgopoloo tša bona—tša bona; kerekeleina ye nngwe le ye nngwe e nyaka dihlopha tša bona godimo ga ye nngwe. Eupša go tla yo Motee, gomme yoo e tla ba Jesu Kriste. Yena ke Mmuši wa legohle; ga go yo motee ntle le Modimo Yenamong.

⁶² Nebukadinetsara, letšatši le lengwe, o dirile selo se sebe, o lahletše bana ba bararo ba go dumela ka leubeng la mollo. Gomme ge a butše mojako go bona ka fao ba bego ba eya mmogo ka kua, o bone Monna wa bone ka gare ga leuba. Gomme o bone eng ge o lebeletše, Nebukadinetsara? O rile, “O bonagetše boka Morwa wa Modimo.” Seo ke se a se bonego ge a lebeletše ka go bosenyi bjo a bo dirilego, fao go be go le yo Motee yo a bego a lebega bjalo ka Morwa wa Modimo.

⁶³ Hesekiele o lebeletše letšatši le lengwe, o rile, “Ke Mmone, le nna, gomme O be a le Lebili ka bogareng bja lebili, le dikologa, godimo ka bogareng bja sebakabaka.” Seo ke se A bogegilego boka sona go Hesekiele.

⁶⁴ Johane, yo mogologolo go baprofeta bohole, o bile yena yoo a tsebišitšego Jesu. Jesu o rile o be a le “yo mogolwane go feta motho e ka ba mang a tswetšwego.” A le kile la nagana gobaneng seo se bile? Bohle ka moka ga bona ba boletše ka Yena, “Lentšu la Morena le tla go moprofeta,” yeo ke Beibele e boletšego bjalo, gomme ka go baprofeta bohole ba bangwe e tlide go bona ka dipono. Eupša ge Lentšu le etla go Johane, Le be le le nama. Jesu o be a le Lentšu. Yena ke Lentšu. Ka mehla O be a le Lentšu, eupša fa ke moo botlalo bja Modimo “bo dirilwego nama le go

dula magareng ga rena.” Ge A etla go yena ka meetseng, o be a le moprofeta. Gomme ge Lentšu le dirilwe nama, Le swanetše go tla go moprofeta. Lentšu, e ka ba kae Le lego, Le swanetše go tla go moprofeta, gobane moprofeta ke yena Lentšu le tlaggo go yena. Gomme Johane o be a le moprofeta wa letšatši.

⁶⁵ Gomme ge Lentšu le etla go yena, le sepeletše ntle ka meetseng gomme la re, “Ke nyaka go kolobetšwa.”

⁶⁶ Gomme Johane o rile, “Ke hloka go kolobetšwa ke Wena, gomme gobaneng O etla go nna?”

⁶⁷ O rile, “Lesa go be bjalo bjale, ka gore go re swanetše go phethagatša toko yohle.”

⁶⁸ A le kile la nagana gobaneng Johane a boletše seo? Gobaneng Johane a boletše seo go Jesu? Gobaneng? Gobane go . . . Go be go swanetše go bona. Ba be ba . . .

⁶⁹ Go be go le mo—mo moprofeta le Lentšu, gomme Lentšu le ttile go moprofeta, bjale go be go swanetše go bona gore toko yohle e swanetše go phethagatšwa. Go diregile eng? Morago Johane o kolobeditse Jesu. Gobane, Johane go beng moprofeta gomme o tsebile Lentšu, sehlabelo se swanetše go hlatswiwa pele se neelwa, gomme ke ka baka leo Johane a kolobeditšego Jesu.

⁷⁰ Johane o lebeletše, gomme o bone. O tsebile bjang yo e be e le Jesu? O bone leeba, leo le boditšwego yena ke Moya wa Modimo. “Gomme godimo ga Yena yo o tla bonago Moya o theogela, gomme wa dula godimo ga gagwe, Ke Yena yo a tla kolobetšago ka Moya wo Mokgethwa le Mollo.”

⁷¹ Noage o lebeletše. Re hwetša fa, go bile le monna yo mongwe a lebeletšego, ka leina la Noage—Noage. O lebeletše gomme o bone toka ya Modimo godimo . . . Kahlolo ya toka ya Modimo, a ke re, godimo ga moloko wo mobe wa go gana Lentšu, e be e tšhollew ntle. Ka ponong ya gagwe, bjalo ka ge Noage a bile moprofeta, Modimo o mo file pono ya mokgwa wa go aga areka, le go mo laela mokgwa wa go dira kago, ka fao e swanetšego go agwa. Ka go se, Noage o be a ka kgona bjang, ntle le ge pono ye e le Lentšu la Modimo, ge a bone bogale bjo le go dira tsela ya tokišetšo?

⁷² Ka mehla, pele ga kahlolo ya go tla, go na le tokišetšo e a dirwa. Ka mehla ke Lentšu la Modimo.

⁷³ Gomme ge a be a aga Lentšu la Modimo mmogo, a bea bohlatse gore pono ya gagwe e be e le therešo gomme o dumetše go yona, bakweri ba dirile metlae ka yena, le go ya pele. Eupša Noage o be a lebeletše pele gomme o bone toka ya Modimo e be e swanetše go nyaka kahlolo godimo ga batho, gomme o agile areka go phološa lapa la gagwe mong. Ge a lebeletše, o bone bogale bjo bo tlaggo bja Modimo, gomme o dirile ditokišetšo go batho go phonyokga selo se.

⁷⁴ Ka mokgwa o bjalo le Johane Mokolobetši o dirile, o dirile tokisetšo ya go phonyokga.

⁷⁵ Gomme go bjalo ka Moya wo Mokgethwa, lehono, o bulela go Tla ga Jesu Kriste madibogo, o dira kago, Mmele wa Jesu Kriste. Re kolobeletšwa ka go Wona; e sego ka thutotumelo, e sego ka kerekeleina goba go šišinya seatla. Eupša, “Ka Moya wa Modimo re kolobeletšwa ka Mmeleng wa Jesu Kriste,” kago ye e tla emelago dikahlolo, gobane O šetše o ahlotšwe. “Ge Ke bona Madi, Ke tla feta bokagodimo ga lena.” Ee.

Noage, o lebeletše gomme o bone se se bego se etla.

⁷⁶ Moshe o lebeletše, letšatši le lengwe, o bone Pilara ya Mollo. E gogile šedi ya gagwe. Moithutamodimo yo mogolo yo, o be a kitimile ka tlhahlo yohle ya gagwe ya thutamodimo, le kwešišo ya gagwe (ka mmagwe) ya Lentšu Lonamong. Ka fao a bego a swanetše go lokolla bana ba Israele. Eupša ge a lekile tseleng ya gagwe, o šitilwe. Gomme le ge mmagwe a mo laetše ka go tsenelela ka se a ka se dirago, le se a bego a tla se dira, le se Modimo a mo tsošeditšego sona. Tsebo yohle ye, gabotse bjalo ka ge e le, gomme e lokile, eupša go le bjalo e be e swanetše go tlogelwa go tloga. Yeo e be e no ba metšhene.

⁷⁷ Metšhene ga se ye e sepedišago sefatanaga. Ke maatlatshepedišo a a se sepedišago.

⁷⁸ Metšhene ga e sepediše kereke; ke maatlatshepedišo, Moya wo Mokgethwa wo o tsenago ka go Lentšu le. Ga se seminari ye e go rutago thutamodimo yohle le ditlhathollo tša Segerike. Eupša ke maatlatshepedišo a Moya wo Mokgethwa ka fale, go gotetša Mollo wola le go o tliša go phethega, le go e dira e phele feela tlwa se Lentšu le le tshepišitšwego le lego go iri ye. E sego dikgerekere; maatlatshepedišo! Go tsea dikgerekere le maatlatshepedišo, Lentšu le Moya, ke Tšona tše di fago Bophelo.

⁷⁹ Se Modimo a se tshepišitšego go iri, se lebelele go phethagatšwa. O swanetše go lebelela go Yena, gobane Yena ke Lentšu. Gomme tsela e nnoši o ka kgonago go lebelela go Lentšu, ke go lebelela go Yena. Lebelelang go Yena, Yena ke Lentšu, gomme Lentšu le le tshepišitšwego bakeng sa letšatši le le swanetše go phethagatšwa letšatšing le. Nako ya Noage e be e ka se kgone go tlatšwa letšatši le; e be e no ba seswantšho, nako ya Moshe, le go ya pele. Eupša le ke letšatši leo Modimo a tshepišitšego dilo tše tseo bjale re ipshinago ka tšona, dilo tše tseo bjale re di bonago, tseo lefase le di segago, maatla a magolo a a nako a Moya wo Mokgethwa ao a kgonago go fetola pelo ya modiradibe, ao a kgonago go tsea moleloko yo bolelo wa kereke le go mo fa bopaki bjo bo tla gotetšago kereke, go tšwa mo a tšwago gona. Ke maatlatshepedišo ao a tsenego ka go Lentšu.

⁸⁰ Bjalo ka ge ke be ke fela ke bolela, ke hweditše magoro a mabedi a batho. Yo motee wa bona ke wa motheo; ka maemo o

tseba mo a lego ka go Kriste, ka baka la Lentšu, eupša ga a ne tumelo e ka ba efe ka go se a se dirago. Ga se a amogela Moya wo Mokgethwa. Morago ke hwetša Mapentecostal, ba bantši ba bona ba amogetše Moya wo Mokgethwa, eupša ga ba tsebe ke bona bomang. Go no swana le monna yo a nago le tšhelete ka pankeng gomme a sa kgone go ngwala tšheke, gomme yo mongwe o kgona go ngwala tšheke gomme ga a na le tšhelete ka pankeng. Ge o ka kgona go tliša ba babedi bao mmogo, ge o ka kgona go dira Mopentecostal go lemoga ke yena mang, le go tla morago go la kgonthe, Lentšu la go tlala la Modimo; ka kolobetšo yela ya Moya wo Mokgethwa, e tla gotetša lefase gape ka tsošeletšo ye mpsha ya pentecostal. Ngwanešu, kgaetšedi, yeo ke therešo.

⁸¹ “Lebelelang go Nna, lena bohole magomo a lefase; gobane Ke nna Modimo, gomme ga go yo mongwe gape ntle le Nna.”

⁸² Oo, re kgona go hlatha bokomonisi, re kgona go hlatha se sengwe le se sengwe gape, eupša ke a makala ge eba re kgona go hlatha karolo ya Lentšu leo le abetšwego ke Modimo bakeng sa letšatši le? Ke a makala ge eba re ka kgona go bona leswao le Modimo a re boditšego le tla ba mo lefaseng ka letšatši le? Ke a makala ge eba re a e dira?

⁸³ Ee, morago go Moshe gape. O be a le gohle...a na le dikgerekere tšohle ka yona, eupša letšatši le lengwe ka sethogweng se se tukago, o kwele Monna a bolela ka segalontšu sa motho, Pilara ya Mollo ye e tukago morago ka sethogweng, e bolela ka go segalontšu sa motho, gomme o rile, “KE NNA YO A LEGO GONA. Gomme Ke kwele metsetlo ya batho ba Ka. Ke elelwa Lentšu la Ka, gomme Ke tlide fase go ba lokolla. Gomme Ke roma wena go e dira.” A monna wa go fapano yo a bego a le yena, ka pela ge a hweditše...O be a na le dikgerekere, eupša o ile a hwetša maatlatshepedišo ka go tšona. “Ka nnete, Ke tla ba le wena.” Seo ke sohle e se tšerego go Moshe go ya, o lebeletše gomme o bone ka sethogweng se se tukago.

⁸⁴ Moragwana ka leetong, re hwetša Israele ge ba be ba tšwela ntle. Ba lebeletše, le bona, gomme ba bone sephente ya mphiri. Gomme ka go sephente ye ya mphiri yeo e hlomilwego bakeng sa bolwetši bja bona...Ba be ba dirile sebe, gomme ba bone sephente ya mphiri. Ka go sephente ye ya mphiri ba e bone, ka sekai, kahlolo yeo Modimo a bego a tla e bea godimo ga Jesu Kriste, go hwela rena bohole badiradibe ba go hloka maswanedi, ba molato. Seo ke se a se bonego.

⁸⁵ Barutiwa ba lebeletše go Yena, nako ye nngwe, bothateng, ntle lewatleng, gomme ba bone eng? Ba bone thušo ya bona. Ba bone thušo e etla ka Yena.

⁸⁶ Mareta, letšatši le lengwe ge a bile le lehu ka lapeng, ngwanabo mong o be a hwile, Latsaro, ngwanešu a nnoši a bilego le yena. O lebeletše go Yena mo nakong ya lehu, gomme o bone tsogo le Bophelo. Seo ke se a se bonego ka Yena.

Bjale, go be go bonala o ka re O be a mo ganne; O be a sepetše ge ngwanaboo a ehwa. Eupša selo sa pele le a tseba, gateetee O hweditše... Morago ga ge mošemane a hwile, le go bolokwa lebaka la matšatši a mane, o be a šetše a nkga.

⁸⁷ Mareta o tsebile gore go be go le selo se sengwe ka Yena se bego se fapano. O be a badile Lengwalo. O Mo dumetše go ba Morwa wa Modimo, Imanuele, Modimo a dirilwe go bonagala. O tsebile gore O be a le moemedi wa Modimo. Gomme o tsebile, ge Eliya a kgonnne go tsoša lesea le le hwilego, gomme yena a no ba karolo ya Lentšu, bakeng sa iri; Kriste o be a le botlalo bja Lentšu, o tsebile ka kgonthe O be a na le maatla go tsoša ngwanaboo. Gomme ge a ile go Yena mo iring ya lehu, ka manyami, o hweditše tsogo le Bophelo ge a lebeletše go Yena. Ga se a lebelela go Yena go Mo swaswalatša, goba go Mmotšiša gobaneng A se a tla, goba go Mmotšiša.

⁸⁸ Ga wa swanela go tsoge wa botšiša Lentšu la Modimo. Seo ke se se tlišitšego moloko wohle wa batho ka bothateng, ge Efa a botšišitše ge eba Modimo o tla boloka Lentšu la Gagwe lohole goba aowa. Ke re bošegong bjo, baena, go tlide nako mo re swanetšego go dumela Lentšu le lengwe le le lengwe Modimo a le ngwadilego. Ke nthatana ye nngwe le ye nngwe, Therešo. “Motho o tla phela ka Lentšu le lengwe le le lengwe le tšwelego molomong wa Modimo.”

⁸⁹ Bjale re hwetša gore Maria o hweditše tsogo le Bophelo.

⁹⁰ Jairo o dirile bjalo, moprista yo monnyane, modumedi wa sephiri, gore ge a bone Jesu gomme a lebeletše go Yena, o hweditše tsogo le Bophelo.

⁹¹ Batho ba ba swerwego ke tlala ba lebeletše go Yena, letšatši le lengwe, gomme ba hweditše borotho bja go swarelala; sekai gore ba ba swerwego ke tlala lehono ba ka kgona go hwetša Borotho bja Bophelo, e sego go hwetša thutotumelo. Ga o hwetše mothomi, ga o hwetše mompshafatši; o hwetša Bophelo ge o hwetša Kriste, Borotho bja Bophelo.

⁹² Lehadu le le hwago le lebeletše go Yena, ka iring ya tlalelo, gomme o hweditše eng? O hweditše tebalelo ya Gagwe. Ke mang gape a bego a ka kgona go mo lebelela? Mmušo wa Roma o be o ka se mo swarele. Ga go yo mongwe gape a bego a ka mo swarela. Eupša o lebeletše go Jesu, ka tlalelong ya gagwe, gomme o hweditše yo Mongwe Yo a kgonnego go mo swarela.

⁹³ Ngwanešu wa ka, kgaetšedi, bošegong bjo, ge o lekeletše boka a bile nako yela, mo sekaleng sa kahlolo; le go tseba, ge o ka hwa, bošegong bjo, bjalo ka moleloko wa kereke yo bolelo, goba Mopentecostal yo bolelo, goba e ka ba eng o ka bago, o tseba moo o yago. Lebelela go Yena, bošegong bjo, Yena Yo a ka go lokollago. Yo motee, bošegong bjo, ge o no ba feela boleloko feela, gomme ga ba tsebe se tsogo ya Kriste e se rago go phela ka pelong ya motho, lebelela go Yena. Yena ke Modimo, gomme Yena a

nnoši. Le tla hwetša tshwarelo boka yo wa go šokiša, yo mokoto, lehodu la go babja ka sebe le dirile, le lekeletše Sefapanong.

⁹⁴ Balwetši ba lebeletše go Yena. Ba hweditše eng? Ba hweditše Mofodiši. Balwetši bosegong bjo ba sa kgona go lebelela go Yena le go hwetša Mofodiši. Ba hweditše ka go Yena se se bego se emetšwe ka go sephente ya mphiri; ge yeo e be e le sekai, ye e be e le sekaiphethego. Difofu di lebeletše gomme di kgonne go bona. “O a swana maabane, lehono, le go ya go ile.” Bahebere 13:8.

⁹⁵ Moreti o lebeletše nako ye nngwe, ahwetša se a kgonnego go se bona. Fanny Crosby wa sefotu o lebeletše nako ye nngwe, go bona se a bego a ka kgona go se bona. A foufetše, karabo ya gagwe e be e le fa:

Wena Moela wa khomotšo ya ka yohle,
Go feta bophelo go nna,
Ke na le Mang lefaseng ntle le Wena?
Goba mang Legodimong eupša Wena?

⁹⁶ Eddie Perronet, nako ye nngwe, ge a be a sa kgone go rekiša dipina tša gagwe gomme o maketše a dire eng. Gomme o ile morago ka ofising ya gagwe, gomme tšušumetšo yela ya wela godimo ga gagwe, Moya wo Mokgethwa; o tlimateře pene, gomme o lebeletše gomme o Mmone ka maatleng, gomme o ngwadile le go gwadigwatša pina:

Bohle dumedišang Maatla a Leina la Jesu!
A nke Barongwa ba we go ikala;
Tlišang pele korone ya bogoši,
Gomme Mmeeng Morena wa bohle.

Seo ke se a se bonego ka Yena. Oo, nna!

⁹⁷ Petro, motheadihlapi wa selegae; ge ngwanaboo a be a tsenetše tsošeletšo ya Johane Mokolobetši, Andrea. Ba be ba e boledišana, ka se Mesia a bego a tla ba sona, le go e ahlaahla. Tatagwe o mmoditše gore, “Go tla ba mahlanya a mantši a tsogago, feela pele ga Mesia, eupša o tla Mo tseba. O tla ba Moprefeta. Morena o rile, ‘O tla ba Moprefeta.’ Re kwešiša go dumela baprofeta ba rena.”

⁹⁸ Gomme mafelelong, letšatši le lengwe, ka phegelelo yohle yeo Andrea a kgonnego go e dira, mafelelong o dirile Petro go tla go Mo theetša, gobane O be a eya go ba le kopano tlase kua lebopong, mosong wo mongwe. O ile tlase go kwa Lentšu la Modimo. Gomme ge a sepeletše godimo ka Bogoneng bja Jesu Kriste, Petro o bone eng ge a lebeletše go Yena? O rile, “Wena, leina la gago o Simone, gomme o morwa wa Jona.” Seo se e rumme go ya go ile. O tsebile Lentšu la Modimo le phethagaditšwe.

⁹⁹ Nathaniele, nako ye nngwe, modumedi wa kgonthe ka go Testamente ya Kgale, o lebeletše pele bakeng sa go tla ga Mesia.

O tlišitšwe ke Filipi, mogwera wa gagwe, ka Bogoneng bja Jesu, a eme godimo ga sefala, kutu ya lepokisi, e ka ba eng e ka bego e bile, a rapelela balwetsi. Gomme ge Nathaniele a sepeletše ka go mothalo wa thapelo, goba e ka ba eng e bilego, gomme a hweditše tebelelo ya mathomo go Yena, o kwele Segalontšu se etla morago go yena, gomme se rile, “Bonang Moisraele, yo ka go yena go sego bomenetsa.”

¹⁰⁰ O rile, “Rabi, O ntsebile neng? O kile wa mpona neng?”

¹⁰¹ O rile, “Pele Filipi a go bitša, ge Ke be ke . . . ge o be o le ka tlase ga mohlare, Ke go bone.”

¹⁰² Na Nathaniele o ile a ipoletšego gore o e bone? Na o rileng? “Wena o Kriste. Wena o Kgoši ya Israele. Wena o Morwa wa Modimo.” Seo ke se a se bonego ge a bone Lentšu la therešo la Modimo la letšatši lela. Mengwaga ye makgolonne ntle le moprofeta, gomme o Mmone a tseba tšona dikgopolo tše di bego di le ka pelong ya gagwe, le se a se dirilego, o tsebile seo se be se ka se be selo bonnyane go feta Mesia. Re be re se na le yona, ba be ba se na le yona, gomme e be e tshepišitšwe, gomme yo mongwe le yo mongwe o tsebile gore nako e be e batametše.

¹⁰³ Kafao re tseba selo sa go swana lehono, re a tseba Jesu o tshepišitše dilo tše. O rile, “Bjalo ka ge go bile matšatšing a Loto, go tla ba bjalo ka go tleng ga Morwa wa motho, go tla ba bjalo ge A etla.” Re bona dilo tše di direga.

¹⁰⁴ Le bona eng ge le lebelela? A le a bona, le nagana ka nonwane, goba—goba le bona mohuta tsoko wa—wa go bala monagano, goba le nagana eng, boka ba dirile morago kua? Bafarisei ba lebeletše godimo ga Gagwe, ba ile ba reng? “Monna yo o ne diabolo.” Batho ba go swana ba lebeletše Motho wa go swana, batho: yo motee o bone Morwa wa Modimo, Lentšu le le tshepišitšwego le hlatsetšwego; gomme yo mongwe o le biditše diabolo. O bona eng? O lebeletše eng lehono ge o bona maatla a Moya wo Mokgethwa a swiela ka moagong, a phethagatša tshepišo ya Gagwe gore ka matšatšing a a mafelelo se A tla se dirago? O bona eng ge o lebelela? Ge o bona Lentšu la Modimo le hlatsetšwe, gona ke Moya wo Mokgethwa wa Modimo. Ee, mohlomphegi.

¹⁰⁵ Nathaniele o bone Lentšu le le tshepišitšwego leo a le pheletšego, go bona tshepišo ye e tloditšwego e dirilwe nama. Moshe, moprofeta, o be a boletše bjalo. Moshe yola, moprofeta yo a tloditšwego, o be a tshepišitše Lentšu lela.

Mosadi mo sedibeng, letšatši le lengwe.

¹⁰⁶ Batho ba bantši ba Mo ganne. Bafarisei le Basadutsei ba Mmiditše “diabolo.” Ba rile, “O dirile se ka go bolelelamahlatse. O be a le moyo wo mobe. O be a gafa. O be a se ne lefelo go ya; seo ke se e bego e le bothata ka Yena, gore O be a no ba mo—mo monna wa legwaragwara.”

¹⁰⁷ Go diregile eng? Go diregile eng? O fetile ka Samaria, le toropokgolo ya Sikara. Gomme ge A ile ntle kua, letšatši le lengwe, le go dula fase godimo ga—ga ponagalo ye nnyane kua. Go bile le mosadi yo a tlilego ntle go nwa meetse, gomme o rile. . . . Gomme O mo kwele. O kwele Segalontšu se re, “Ntlisetše seno, mosadi.” Gomme Yena . . . O lebeletše godimo, o bone eng?

¹⁰⁸ Sa pele, ga se a kgone go e kwešiša. O Mmotšišitše. “Ga se setlwaedi go lena Basamaria go—go kgopela, goba lena Bajuda go kgopela Basamaria se sebjalo.”

O rile, “Eupša, mosadi, ge nkabe o tsebile Yo o bego o bolela le yena!”

¹⁰⁹ Bjale elelwang, go be go le Seetša se sennyane, peu ya Bophelo e robetše kua, o be a kgethetšwepele go tloga motheong wa lefase. O be a Bo šeditše. O be a tennwe ke thutamodimo yohle ya bona le dilo tšeob ba di boletšego. Eupša o be a šeditše se sengwe, gobane o tsebile go be go etla Mesia.

Gomme O rile, “Sepela o tšeemonnamogatša wa gago gomme le tle mo.”

O rile, “Ga ke naye.”

O rile, “O boletše therešo. O bile le ba bahlano.”

¹¹⁰ Ka pela, peu ye nnyane yela e tabogetše Bophelong. O bone eng? O bone leswao la Mesia, ka go Monna. O bone Lentšu le le tshepišitšwego le dirwa go bonagala. O rile, “Mohlomphegi, ke a bona gore O moprofeta. Ga se re be le yo motee lebaka la makgolo a mengwaga. Re a tseba gore re tshepišitšwe gore Mesia o etla, gomme, ge A etla, O tla re botša se. Seo ke se A tla se dirago.” Le a bona? O bone eng, o bone eng? O bone leswao le le bego le tshepišitšwe go letšatši leo, le dirwa go bonagala.

¹¹¹ Moya wo Mokgethwa o tshepišeditše letšatši le, maatla a tsogo ya Gagwe, Kereke, gore, “Maswao a a tla latela bona ba ba dumelago.” Jesu o tshepišitše, “Gomme dilo tše Ke di dirago le tla di dira le lena.” O lebelela eng ge o bona?

¹¹² Ge o eya kerekeng ka Lamorena mosong, a o lebelela okene ye kaone, modiredi wa go apara gabotse, khwaere ya go apešwa, sehlopha sa basadi ba apere pente? O lebelela eng, mohuta tsoko wa sosaece ka dikerekeng? O wa se le sela. O lebeletše eng? Ke ka ga se o se bonago. Theetša mo. Ga go makatše, ge o rwala Ebangedi ya mpapatla, le go bona Moya wo Mokgethwa o etla ka gare le go O dira o bonagale magareng ga sehlopha sa fešene ya kgale sa batho, ke bjo šele go wena, go thata go wena go dumela.

¹¹³ Bjalo ka ge ke boletše bošegong bjo bongwe, ka Josefa, “Go be go le bothata go yena go nagana ka Maria a imile. ‘A be a ka kgona bjang go ba seo, mosadi yo monnyane yo mokgethwa ka mokgwa woo, gomme o rile Gabariele o be a mo etetše?’” Eupša go be go se gwa tlwaelega kudu. Go be go se gwa tlwaelega kudu go selo sa go swana le seo. Ga se ya ke ya direga pele.

¹¹⁴ Ke mo Modimo a dulago, ka go se se sego sa tlwaelega, go monagano wa nama. Eupša bao ba Mo dumelago go swana maabane, lehono, le go ya go ile, dilo tšohle di a kgonega. Lentšu le lengwe le le lengwe leo Ā le tshepišitšego le tla phethagatšwa. Ke dilo tša go se tlwaelege tše di Mo dirago Modimo. O ya go ba go se tlwaelege. O dira se sengwe le se sengwe go se tlwaelege go batho. Ee, mohlomphegi. Go lokile.

¹¹⁵ Mosadi o lebeletše go Yena, gomme o bone leswao la Mesia, Modimo a bonagaditšwe nameng. Ba bantši, batho ba go swana, ba lebeletše gomme ga se ba bona selo.

¹¹⁶ Basedumele ka matšatšing a Noage, ba bone eng? Lehlanya, le hlahlathile go se a se biditšego sekepe. Seo ke sohle ba se bonego. Ge, sona sekepe ka bosona se agilwe ke pono go tšwa go Ramaatlakamoka Modimo. Sona selo se a bego a se kokotela, molaetša wa gagwe wo a bego a o rera, o be a aga ka molaetša wa gagwe, a bea bohlatse gore o be a lokile gomme o be a lebeletše pele. O phetše se a se rerilego.

¹¹⁷ Seo ke se re swanetšego go se dira lehono. Ga go motho a nago le tokelo ya go rera go fihla a tladišwe ka Moya wo Mokgethwa. Nnene! Baithutamodimo le boradipalontshetshere, le go ya pele, ba ka kgona go O hlatholla ohle go tloga go lena. Eupša ge motho a kile a ba ka lehlakoreng la morago la leganata, ka go lefelo lela le lekgethwa, le go kopana le Modimo boka Moshe a dirile, ga go motho a ka tšeago seo go tloga go yena. O a tseba! O be a le yena a bego a le ntshe. Ga go yo a ka kgonago go mmotša e ka ba eng ka yona. O be a le ntshe. Ke ka baka leo Jesu a laetšego barutiwa ba Gagwe, “Le se ke la rera go fihla le eya godimo toropongkgolo ya Jerusalema gomme le amogela Maatla go tšwa Godimo, gona le tla ba dihlatse tša Ka.” Seo ke se ba se bonego. Ee, mohlomphegi.

¹¹⁸ Noage. Ga se ba kgone go bona selo; ba dirile eng morago ga go dira seo? Ba hlokomologile Lentšu la Modimo gomme ba tliša kahlolo godimo ga bonabeng. Yeo ke nnene.

¹¹⁹ Ke re, le Jack Moore, e sego go mo tsopola, eupša go bolela se, ka gore ke nagana gore ke sa sehla bjale. Jack Moore o rile, “Ge Modimo a sa nweletše Amerika le go mo tšuma, O tla swanela go tsoša Sodoma le Gomora gomme a kgopele tshwarelo go ba tšumeng.” Gomme yeo ke therešo.

¹²⁰ Modimo o lokile. Lentšu la Gagwe le na le moputso wa toka, gomme ka kgonthe O tla ahlola lefase bakeng sa tiro ya lona kgahlanong le Lentšu la Gagwe lehono. Ga go kgathale ke dikgobokano tše kae re nago le tšona, ke dikgobokano tše dintši gakaakang tša bodumedi re nago le tšona, yeo ga se yona. Lentšu le!

¹²¹ Lebelelang, ga go sa na dinako tša bodumedi go feta go bile letšatši leo ge Jesu a tlile lefaseng, oo, se sengwe le se sengwe se meditšwe ka go bodumedi le metlwae, gomme sohle se fošagetše!

¹²² Go bile bjalo ge Amose, yo monnyane, moreri wa hlogo ya lefatla; ga re tsebe moo a tšwago gona. Mahlo a gagwe a mabedi a mannyane a sesefetše ge a etla godimo go kgabaganya thaba le go lebelela tlase ka Samaria. E be e le toropokgolo ye kgolo ya baeti, boka Phoenix. Bontši bja batho ba tlide go tšwa godimo ga lefase, go lebelela, go lebelela toropokgolo ye kgolo ye, e be e le ye botse bjang. Oo, se sengwe le se sengwe se be se eya pele, diklapo tša bošego le lefelo la kgonthe la nyakalalo, “lefelo go phela,” ba boletše. Eupša ge mošemane yo monnyane yo wa molemi, a rathilwe ke Moya wo Mokgethwa, o tlide tlase go kgabola fale, o be a se na le motho go ya pele le go dira ditokišetšo tša dikopano tša gagwe, o be a se na le maswao godimo, ga go kerekeleina go ingwadiša le yena, goba ga go motho go mo thekga. Eupša ge a sepeletše godimo go kgabaganya thaba gomme a kotobetša mahlo a mannyane ale, ge a lebeletše tlase godimo ga toropokgolo yela, o bone se sengwe seo go sego le o tee wa bona ka moka a se bonego. Bohle ba bona ba bone nyakalalo le dilo tša toropokgolo. Eupša o bone kahlolo ya go okaoka ya Modimo, gomme o profetile kgahlanong le yona. Ba mmiditše “wa go tshereana.” Eupša mengwaga ye lesometee moragwana, yohle e diregile feela tlwa ka tsela ye a boletšego.

¹²³ Motho yo a ka kgonago go lebelela godimo ga kereke ka tsela ye e yago lehono, le batho ka tsela ye ba yago, le go akanyetšapele ditšhegofatšo ka moso? Ke akanyetšapele kahlolo, yeo e nnoši. Modimo wa toka o nyaka kahlolo, bakeng sa go hlokomologa Lentšu la Gagwe. O no ba go tla le go E tsebagatša pele ga rena, le go E lokiša. Eupša Modimo wa toka, go kgabola mabaka ohle, A ka se kgone go fetola polane ya Gagwe. Ga A tsoge a fetola polane ya Gagwe. O a swana maabane, lehono, le go ya go ile. Ditsela tša Gagwe di a swana. Lentšu la Gagwe le a swana. Tšohle, O a swana. O tletše ka kgaogelo ge yo mongwe a le komana go sokologa, eupša kahlolo e tla latela ge o sa sokologe.

¹²⁴ Farao, ge a lebeletše godimo, gomme yo a bitšwago lehlanya, yo a bitšwago moprofeta wa lehlanya, le ditleleimi tše dintsi tša tokollo, ke sohle a se bonego. Eupša Baisraele ba bone seatla sa Modimo godimo ga Moshe. Ee, mohlomphegi.

¹²⁵ Monna wa mohumi o lebeletše gomme a bona, o be a na le dikgonagalo, eupša mokgatlo wa gagwe e be e le wo mogolwane go feta se a bego a ka kgona go ya go se kgabola ka Bjona. Tebelelo ya gagwe ya go latela e kae? O lebeletše go tšwa heleng. Yeo ke tlwa. Kahlolo e tlide go yena. Yeo e bile nako ya go latela a lebeletšego. Go tla ba bjalo ka batho ba bantši lehono.

¹²⁶ Lešole la Moroma le tšere tebelelo, nako ye nngwe, ge ba bapotše Jesu. O lebeletše go bona se A se dirilego, eupša go be go le thari kudu nako yeo.

¹²⁷ Bagwera, Amerika e ya go dira seo, le yona. Ba ya go lebelela letšatši le lengwe, le go re, “Ka therešo yola e be e le Morwa wa

Modimo,” eupša go tla ba thari kudu. Ba be ba segile le go dira metlae lekga la mafelelo.

¹²⁸ O kgonne feela go lebelela nako yeo le go bona moo a ka bego a phološitšwe, eupša go be go le thari kudu nako yeo. O be a a bapotše Mokgoma wa Bophelo.

¹²⁹ Gomme makga a mantši kudu, lehono, batho ba retologa go tloga go Jesu Kriste go tšwa dipelong tša bona, ge ba Mmona a a hlatsela ka go hlaka Yo A lego yena, thwi magareng ga ren. Ee, mohlomphegi.

¹³⁰ Pilato o lebeletše, letšatši le lengwe, gomme a kgodišega, eupša dipolitiki tša gagwe e be e le tše kgolo kudu. O be a no se kgone, o be a sa kgone go ema godimo go yona.

¹³¹ Luther o lebeletše, gomme o bone tokafatšo. O ile le yona. Morago ba kgatlofaditše.

¹³² Wesley o tlide mmogo, a bona tlhwekišo ge a lebelela Kriste, gore kereke e swanetše go hlwekišwa. Gomme e ile thwi pele ka tlhwek- . . .

¹³³ Pentecost e tlide mmogo gomme e bone pušetšo ya dimpho. Bohle ba dirile eng? Feel a tlwa boka Katoliki e dirile, ba e kgatlofaditše, ba e beile thwi morago gape.

¹³⁴ O Modimo! Letšatši le lengwe ke tšere go lebelela, gomme, ge ke dirile, ke bone Alefa le Omega. Ke bone Mathomo le Mafelelo. Ke bone Jesu Kriste wa go swana maabane gomme . . . Ke bone Moswaredi wa sebe sa ka. Ke bone yo Mongwe yoo a tšerego lefelo la ka. Nna!

O bona eng ge o lebelela?

¹³⁵ Ke lebeletše thwi bjale go mogwera wa ka wa kgale, Bill Dauch, a dutšego fa. Monna o ya pele bogolo bja mengwaga ye masomesenyane pedi. Matšatši a se makae a go feta, e sego kgale kudu, a ke re, e ka ba dikgwedi tše tshela tša go feta, o bile le go šitwa ga pelo ga go felela le tlhaselo ya pelo, mmogo.

¹³⁶ “Ngaka o re o a hwa.” Mosadimogatša wa gagwe o nteleditše gomme o rile, “Ngwanešu Branham, etla. O a hwa. Bill ke mogwera wa gago.”

Gomme ke rile, “Go lokile, ke tla e dira.”

¹³⁷ Gomme tseleng ya ka go ya lefelong la gagwe, ke be ke rapela. “Modimo, ke hloya go ya go mmotša ‘tselatšhweu.’ Ke a tseba ge a ka be a nno phela go fihla ke fihla kua, gore ke kgone go mmotša ‘tselatšhweu.’” Ka tlase ga oksitšene, go šitwa ga pelo ga go felela, bogolo bja mengwaga ye masomesenyane tee. Ke gatetše ka ntle ga seteše sa petrole, gomme ke lebeletše, gomme, ge ke dirile, ke bone Bill a etla go theoga mokgotha le go šišinya diatla le nna.

¹³⁸ Šo o dutše bošegong bjo. Ngaka yo a mmoditšego seo, o hwile. Gomme fa go dutše Bill Dauch yenamong, go tšwa Lima, Ohio,

a otlela go theoga go kgabola kapoko le lehlwa, o latela kopano ye nngwe le ye nngwe ke yago. Gobaneng? Re lebeletše; re bone se sengwe. Modimo yola wa go swana yoo ke boletšego ka yena bošegong bja go feta, mošola ka Colorado, mo nakong ya ledimo, ke lebeletše, ke bone gore O be a swana maabane, lehono, le go ya go ile.

¹³⁹ Mo go dutše Mna. Way, monna wa Moisimane, o dutše mo ka lehlakoreng, thwi mo bjale, ke sa tšo mo lemoga a dutše mo. O tšwa Indiana. Ke monna wa Moisimane. Mosadimogatša wa gagwe ke mo—mo mooki yo a ngwadišitšwego. Monna yo mokaone! Letšatši le lengwe, ke boletše le yena. Ke be ke rera ka kopanong, o ganeditše se ke se boletšego, ka pelong ya gagwe, gomme, ge a dirile, o wele a hwile thwi ka go batheeletši. O hwile kua. Mosadimogatša wa gagwe o mo swere gomme o mo kwele; mahlo a gagwe, sefahlego se fetogile boso, mahlo a gagwe... a se a apara, mahlo a gagwe a ferogile le go ya morago ka morago ga hlogo ya gagwe. Ke rile, “Šišimalang.” Ke lebeletše tlase fale go yena, gomme ke naganne, “Oo, monna yola o robetše fale, a hwile.”

¹⁴⁰ Ke ile tlase, ka bea diatla tša ka godimo ga gagwe, o be a no tonya boka teseke yela e le. O be a ile. Mdi. Way o rile, “Oo, Ngwanešu Branham, o ile! O ile.” A goelela ntlhoreng ya segalontšu sa gagwe.

¹⁴¹ Ke lebeletše kgole. Ke bone tsogo le Bophelo. Ke rapetše thapelo ye Jesu a mpoditšego go e rapela, gomme Ngwanešu Way a tsoga. So o dutše thwi mo bošegong bjo, o tlide go tšwa bahung, o dutše thwi mo bošegong bjo.

¹⁴² Yeo ke nnete, Mna. Way, ge o ka no ema feela motsotso, gore batho ba bone. Gomme Bill Dauch šo o dutše *mo*.

¹⁴³ Ke eng? Gobane re lebelela go Yena Yo a swanago yo a tsošitšego Latsaro, O a swana bjalo ka ge A bile. O a swana maabane, lehono, le go ya go ile. Ee, ga A fetoge.

¹⁴⁴ Mo go dutše moreri yo monnyane o dutše mo ka pele ga ka, ka leina la Blair. Mošemané wa gagwe yo monnyane o be a le ka kotsing letšatši le lengwe, gomme mosadimogatša wa gagwe a dutšego fale, a phumula mahlo a bona bjale go tloga go megokgo. Ba mpiditše mogaleng tlase kua, gomme a re, “Ngwanešu Branham, mošemané wa rena yo monnyane o be a le ka koloing gomme a kitima godimo ga thaba, gomme o šilagantšwe, o hlakahlakane bjoko bja gagwe, le se sengwe le se sengwe. O ile, feela e ka ba; o no se heme.” O rile, “A o tla rapela?”

Ke rile, “A re rapeleng.”

¹⁴⁵ Gomme ka thoma, ka lebelela, se mogaleng, gomme ka thoma go rapela. Ka re, “Morena Modimo, ke tla reng go bona?” Ke bone mošemané yo monnyane a eya, a kitima le go taboga thapo, a kitima go theoga ka mokgwa wola. Ke rile, “O ya go fola.” Gomme šo yena bošegong bjo. Gomme šeba ba dutše fa.

Gobaneng? Gobane Jesu Kriste o a swana maabane, lehono, le go ya go ile.

¹⁴⁶ Lebelelang! Lebelelang! Le bona eng ge le Mmona? Ke bona Mofodiši wa go swana. Amene. Ke bona Yena wa go swana yo a sepetšego ka Galelia. Ke Mmona ka maatleng a Gagwe. Ke Mmona a hlatha dikgopolole diphiri tša pelo, a bontšha—a bontšha leswao feela pele ga nako ya bofelo. Ka fao re ka kgonago go ya go kgabola batheeletši ba le go kgabaganya ditšhaba, re bolela se A lego sona lehono!

¹⁴⁷ Le tseba se ke se naganago? Boka monegro wa kgale a boletše nako ye nngwe, ka nakong ya makgoba. Letšatši le lengwe, o tlie go dikologa, o rile, “O a tseba, mo... Ke lokologile bjale.” Kafao o bile go bolela magareng ga makgoba a mangwe, gomme makgoba a rile...

¹⁴⁸ Gomme e ile morago go mong. Gomme mong o rile, “Etla ka mo, Sam.” O rile, “Ke eng seo o se bolelago magareng ga makgoba ntle fale?”

O rile, “Molaodi, ke lokologile.”

O rile, “O lokologile bjang?”

¹⁴⁹ O rile, “Ke lokologile go tšwa go molao wa sebe le lehu, ka gore Jesu Kriste o ntokolotše.”

O rile, “Sam, o ra seo?”

O rile, “Ee.”

¹⁵⁰ O rile, “Ke tla ya tlase le go saena tokologo ya gago, le go go dumelela o ye go botša baena ba gago ka seo.”

¹⁵¹ Mokgalabje o rerile lebaka la mengwaga le mengwaga. Mafelelong, letšatši le lengwe, o tlie mojakong wa gagwe, o ile a swanelo go arogana le bophelo bjo. Gomme ge a be a sa robetše malaong a gagwe, ka kidibalongkolo lebaka la matšatši a se makae, ba bantši ba baena ba gagwe ba bašweu ba tlie mmogo go—go mmona, go mo laela tselatšhwewu, gobane o be a le lešole la go tšofala la mogale bakeng sa Kriste. Ge a be a sa robetše fale mo malaong, o phafogile, a lebelela go dikologa, gomme o rile, “Mose, a ga o, goba...”

“Sam, a ga o ešo wa sepela?”

¹⁵² “Aowa.” O rile, “Ke ile ka swanelo go tla morago.” O rile “Ke naganne ke be ke le kua.” O rile, “Ke—ke—ke swanetše go be ke e lorile.” O rile, “Ke naganne ke be ke le kua. Gomme ge ke be ke eme kua,” o rile, “Morongwa... Ke be ke sa tšo tšeelwa ka mojakong, gomme,” o rile, “Morongwa o tlie godimo gomme a re, ‘Sam, etla o tše mphaphahlogo wa gago, gomme o tle o tše kobo ya gago.’”

¹⁵³ O rile, “O se ke wa bolela le nna ka mphaphahlogo le kobo, e no ntesa ke eme mo gomme ke Mo lebelele lebaka la mengwaga ye milione.” O bone ka go Yena Yo a mo lokolotšego go tšwa sebeng

le lehung. O bone kua Yena yoo a mo kgomaretšego go kgabola bokoto le bosese. O Modimo!

¹⁵⁴ Mosong wo mongwe, ke be ke robetše malaong a ka. Ke be ke fela ke eba . . . Le tseba kanegelo ya bophelo bja ka. Ke be ke na le mpša ya go tšofala, re be re mmitša Fritz. O nthometše sekolong; makhuto a ophosamo, le dilo. Gabotse, ke be ke fela ke mo tšea mosong wo mongwe le wo mongwe. Ke be ke tla tsoga, tsela lebatong la ka godimo, ka ntlong ye nnyane ya kgale ya dikota, ke be ke tla mo kwa a gobola tlasetlase ka mokoting. Ga se nke a ke a aketša go nna. Ka mehla ge ke ile go yena; o bile le se sengwe go nna.

¹⁵⁵ Le a tseba, wo mongwe wa meso ye, ke tla mo kwa a gobola ka kua ka molapong. Ke swanetše go ya godimo le go bona se a nago naso. Go tla loka.

¹⁵⁶ Theetša, ngwanešu, a nke ke go botše. Go ne selo se tee feela go lebelela ge o bona Jesu Kriste, seo ke go bona Modimo ka go Yena, wa go swana maabane, lehono, le go ya go ile. Ke a dumela O fa, bošegong bjo, go re direla go swana le ge A dirile nako yela.

A re inamišeng dihlogo tša rena feela nakwana, ge re rapela. Rapelang!

¹⁵⁷ A go na le yo motee ka mo, bošegong bjo, a ka rego, "Ngwanešu Branham, kgopela Modimo go ba le kgaogelo go nna. Ke nyaka go lebelela le go Mmona go fapania. Ke Mo lebeletše le go thankia. Ke Mo lebeletše le go makala. Ke Mo lebeletše le go botšisa. Ka kgonthe, a O ntlhokometše? A O a nthata? A dilo tšohle tše tseo di boletšwego ka Yena, a ke therešo? Ke nyaka go tseba ge eba ke therešo. A o tla Mo kgopela go e utolla go nna bošegong bjo?" A o ka phagamiša seatla sa gago? Morena a le šegofatše. Seo se lokile. Mogohle.

¹⁵⁸ Morena yo bohlokwa go na le bontši kudu bo ngwadilwego ka Wena. Re a tseba gore O a swana maabane, lehono, le go ya go ile. Re a rapela, Morena, gore, bošegong bjo, ge re lebelela, gore re tla bona Jesu Kriste. O tshepišitše ka go Lentšu la Gago, gore, mediro ye O e dirilego, re tla e dira le rena. O tshepišitše, ka matšatšing a mafelelo, gore O tla ba morago mo lefaseng, ka sebopego sa Moya wo Mokgethwa, kereke e tla be e tletše maatla, Moya wo Mokgethwa. O rile, "Lebakana le lennyane, gomme go ka se dire lefase botse go lebelela, gobane ba ka se O bone. Eupša le tla O bona, gobane Ke tla ba le lena, ebile ka go lena, go fihla pheletšong."

¹⁵⁹ Morena Jesu, ge go sa na le sebakabotse bakeng sa motho go lebelela, a nke ba lebelele bošegong bjo le go Mmona ka maatleng a tsogo ya Gagwe. Ga se A hwa, eupša O phela go ya go ile, o komana go dira poelano go bao ba lego komana go Mmolela. E fe, Morena. Gomme a nke dikgopelo tšohle tše, tseo di kgopetšwego, di fiwe. Tate, efa dilo tše, Leineng la Jesu Kriste. Amene.

¹⁶⁰ Bjale ke nako ya thapelo bakeng sa balwetši. Ke le rapeletše; dumelang gore Modimo o tla araba.

¹⁶¹ Bjale, ke a dumela Billy o rile o fa dikarata tša thapelo tše dintši. A e be e le tša B? Tša B. Go lokile. Ga re ne nako; ke ile nako ye nnyane nthatana godimo ga nako; ntshwareleng. Ke no ba le metsotso e se mekae. B, re—re tlogetše kae, go tsona, bošegong bja go feta? Re tlogetše kae, re tlogetše kae bošegong bja go feta? [Yo mongwe o re, “Re tšere bohole ba bona.”—Mor.] Oo, re tšere bohole? Re tla no thoma go tloga go B, nomoro tee, gona. Go lokile.

¹⁶² Nomoro tee, mang . . . [Ga go selo lefelong la theipi—Mor.] . . . tharo, nne, tlhano.

¹⁶³ Yo mongwe šetša bjale. Eya tlase fa, Billy, ba bangwe ba lena, ka pelapela, gobane ga re ne nako bjale. Re no . . . gomme le se tsee nako. Dinako tše dingwe ke sefoa gomme ga ba kgone go kwa, gomme, goba mohlomongwe ga ba kgone go emeleta, goba se sengwe. Ge ba le, gobaneng, re . . .

¹⁶⁴ Nomoro tee, pedi, tharo, nne, tlhano. Go lokile, etla pele fa, ge o rata. Go ne tee, pedi, tharo, nne . . . Yeo ke nnene. Ntshwarele, mohlomphegi. Tshela, šupa, seswai, senyane, lesome, a nke ba eme bjale. Tshela, šupa, seswai, yo mongwe bjale, seswai, senyane, lesome. Seswai, senyane . . . Go lokile. Tee, pedi, tharo, nne, tlhano . . . šupa, seswai, senyane, lesome. Go lokile, lesome go fihla go lesometlhano, emeletlang; ka go ya B, gabotse, seo ke sohle dikarata di bilego ntle. Lesometlhano, go lokile, lesometlhano go fihla ka masomepedi, emeletlang. Tee go fihla ka masomepedi, ka go dikarata tša thapelo, tšeang lefelo la lena godimo fa. Tee, pedi, tharo, nne, tlhano, tshela, šupa, seswai, senyane, lesome, lesometee, lesomepedi, lesometharo, lesomenne, lesometlhano, lesometshela, lesomešupa, lesomeseswai, lesomesenyane. Yeo ke yona. Masomepedi go ya go masomepedi tlhano.

¹⁶⁵ Ke ba bakae ba se nago karata ya thapelo? O sa Mo dumela. Ge ba sa tla, ba tšeа lefelo la bona, ge bona masomepedi tlhano ba sa le, masomepedi tlhano a mathomo a etla, a nke ke le botšiše. Beibele e boletše, ka go Puku ya Bahebereg, gore “Jesu Kriste ke Moprista yo Mogolo wa rena.” A le dumela seo? “Yo a kgonago go kgwathwa ke dikwi tša mefokolo ya rena.” A re ya go dula, ka letšatšing le, re tapile; le go bona Moprista yo Mogolo wa rena yo mogolo a itira Yenamong go tsebjia magareng ga rena, gomme ka gona ra dula bjalo ka mohlape wa dimuma o gapša? Aowa, mohlomphegi. A re beng godimo le go dira, ka pelo go kgogakgogano e ka ba efe. Le se be bjalo ka dikgomo tša dimuma di gapša. Ebang mogale! Lena batho lebelelang ka tsela ye gomme le dumele. Lebelelang ka Lengwalong, se A se tshepišitšeego. Go lokile.

Re ka se tsee nako e ka ba efe, re tla thoma thwi ka mothalong wa thapelo.

A re rapeleng gape.

¹⁶⁶ Morena Jesu, e ka diatleng tša Gago bjale. Ke ka diatleng tša Gago. Morena, tsea Lentšu le O le boletšego, “go swana le ge go bile ka matšatšing a Sodoma,” le letee le ke šupago go lona bošegong bjo. O rile, ka go Mokgethwa Johane 14:12, ge O be obolela le barutiwa ba Gago ka go tloga, O rile, “Yo a dumelago ka go Nna, mediro ye Ke e dirago o tla e dira le yena.”

¹⁶⁷ Beibele e boletše gore, “Modimo, dinakong tša kgale le ka mekgwa ya go fapano o boletše le baprofeta, goba, o boletše le botate ka baprofeta; ka go matšatši a a mafelelo ka Morwa wa Gagwe, Jesu Kriste.” Gomme Yena ke Lentšu. Re a tseba gore baprofeta ba tlide, Moya o tlide godimo ga bona le go dira Lentšu lela go phela bakeng sa moloko wola; ba rogakile dikgoši, ba tlišitše kahlolo, ba tlišitše baloki, ba phološitše balahlegi; baprofeta bao Lentšu le tlilego go bona.

¹⁶⁸ Bjale ka go letšatši le la mafelelo, Morena, O tshepišitše. O rile, “Bjalo ka ge go bile ka matšatšing a Sodoma,” ge Abraham a sa dutše fale ka phišong ya letšatši, ye nnyane, Kereke ye e bileditšwego ntle. Re lebelela fase go kgabaganya lefase lehono, Tate, re bona Sodoma tlwa, Bantle ba fapošitšwe, bolelo. Gomme re bona barongwa ba bararo ba ba tšwelela pele ga Abraham.

¹⁶⁹ Ba babedi ba bona ba ile tlase go kereke ye bolelo, Loto, go leka go ba biletša ntle. Ba babedi ba ile tlase kua, Billy Graham wa sebjalebjale, go ba biletša ntle; ga go mehlolo, feela go foufaditše mahlo a bona. Go rera Ebangedi go dira seo.

¹⁷⁰ Eupsa go bile le yo Mottee a šetšego godimo mo go sehlopha sa Abraham, se laetsago bakgethiwa, babiletšwantle, bao ba bego ba se ka Sodoma; ba tswetšwe, ka ntle ga Sodoma, Kereke ya therešo, Peu ya Abraham ya lehono. Gomme ge Monna yo, yo a boletšego le bona, o rile, “Sarah o kae, mosadimogatša wa gago?”

O rile, “O ka tenteng ka morago ga Gago.”

¹⁷¹ Gomme O rile, “Ke ya go go etela go ya ka nako ya bophelo.” Gomme o segile.

¹⁷² O rile, “Gobaneng a segile?” A hlatha se a bego a se bolela le go nagana ka go yena, ka mokokotlo wa Gagwe o furalletše tente moo a bego a le gona.

¹⁷³ Jesu wa Nasaretha, Morwa wa Modimo, o re boditše ka Lentšung la Gagwe, “Bjalo ka ge go bile ka letšatšing lela, go tla ba bjalo ka go tleng ga Morwa wa motho.”

¹⁷⁴ Gomme ke selo sa go tlaba kudu, Tate, gore ga se nke gwa ke gwa ba momphafatši, mo mabakeng ohle, yo a ilego tlase ka Sodoma, ka leina la go felela ka “h-a-m” go fihla lehono. Mohlanka wa gago, Billy Graham, tlase ka Sodoma o dira mošomo wa gagwe.

¹⁷⁵ Bjale, Tate, ke a rapela gore O tla phološa Peu ya Abraham yeo e lego fa bošegong bjo, ba tlatše ka Moya wo Mokgethwa wa yo bohlokwa Morwa wa tshepišo. Ka pela ka morago ga se, Modimo a bonagaditšwe nameng o dirile leswao le, morago morwa wa tshepišo o tlide go lefelotiragalo. Modimo, re be re Mo lebeletše lebaka la mengwaga ye dikete tše pedi, Peu ya Abraham. Ba bantši ba robetše; ye ke tišo ya bošupa, re lebeletše kgoeletše go tla nako e ka ba efe, “Bonang, Monyadi o etla.”

¹⁷⁶ Efa, bošegong bjo, Tate, gore kwešišo ya batho e tla bulwa, gore ba tla bona gore leswao le le tshepišitšwe, feela pele ga Morwa yo a tlago. Gape, bjalo ka ge sephente ya mphiri e be e swantšha Kriste, ka fao morwa yo a tlago le leswao la go tla ga gagwe (ka tlhagong) go kaya ga semoya, ga go tla ga Jesu lehono, Peu ya Bogoši ya Abraham. E fe, Morena. Re e kgopela Leineng la Jesu, ge re neela borena go Wena. Amene.

¹⁷⁷ Ke tla rata go bolela selo se tee feela pele re rapelela balwetsi. Batho ba bantši ba na le kgopolu ya go fošagala ka mpho. Mpho ga se se sengwe seo Modimo a go fago go ya ntle le go re, “Fa, ke tla ya godimo fa le go topa *se*, gomme ke tla tše sela gomme ke tla dira *se*.” Tše ga se dimpho. Batho ba bantši ba nagana seo, eupša ba kgahlegile ka phošo. Mpho ya Modimo e no ba go tseba mokgwa wa go itloša tseleng wenamong gore Modimo a kgone go go šomiša, seo ke sohle mpho e lego. Le a bona? Ge feela o le ka go wenamong . . .

¹⁷⁸ A Jesu ga se a bolela, Yenamong, “Morwa a ka kgona go dira . . .” Mokgethwa Johane 5:19, “Ruri, ruri, Ke re go lena, Morwa ga a kgone go dira selo ka go Yenamong.” O fetile mogobeng wola moo tšona digole tšohle di bego di le gona, gomme a fodiša monna yo motee ka bothata bja proseteite, goba selo se sengwe (bolwetsi) go se itekanele. O rile “Morwa ga a kgone go dira selo ka go Yenamong; eupša se A bonago Tate a se dira, seo Morwa o se dira go swana.” “Ga se nna,” O rile, “yoo a dirago mediro; ke Tate wa Ka yoo a dulago ka go Nna, O dira Mediro.”

¹⁷⁹ Bjale, lena batho le dutšego ntle fale, le se ke la leka go lebelela go motho e ka ba mang. Le lebelela go Kriste; Yena ke Yena. Eupša O tshepišitše ka matšatsing a mafelelo gore O tla iponagatša Yenamong ka nameng ya motho, boka A dirile kua ka Sodoma. Bjale nama ya gago, nama ya ka, a re nong go bula dipele tša rena le go tloša go nagana ga rena beng, le go no dumelela Lentšu go tše tsela ya Lona, bošegong bjo, ka go rena, gona re tla bona dimpho tše kgolo tša Modimo tša Moya wa Gagwe di bonagatšwa pele ga rena.

¹⁸⁰ Ebang tlhomphokgolo ka kgontha. Ga go yo a tlogago. Homolang ka kgontha gomme le rapele. Ke ne kgontha le a leboga.

¹⁸¹ Gomme ge go na le e ka ba mang fa a naganago se ke bofora, ke go hlohla go tla sefaleng. E ka ba mang! Gona, ge o boifa go e dira, o se bolele selo ka yona.

¹⁸² Leineng la Jesu Kriste, ke tšeela moyo wo mongwe le wo mongwe ka mo, ka tlase ga taolo ya ka, go bega Lentšu la Modimo.

¹⁸³ Seswantšho sese bošegong bjo, boka Mokgethwa Johane tema ya 4. Monna le mosadi ba kopana mmogo, ke a nagana lekga la mathomo. Ga ke go tsebe. Ka kgonagalo o a ntseba, ka dipampiri le—le mabarebare, eupša ga ke go tsebe. O tseba seo. Re basetsebane seng sa rena, boka Morena wa rena a kopane le mosadi nako ye nngwe mo sedibeng; monna le mosadi ba kopana, ba bolela.

¹⁸⁴ Eupša ge ke etla boka yo mongwe wa baena ba rena, ka re, “Modimo o mphile mpho ya phodišo, . . .”

¹⁸⁵ Le tseba se mpho ya phodišo e lego sona? Tumelo go phodišo. Le a bona, o no lokolla tumelo ya gago, go rapelela yo mongwe, seo ke sohle mpho ya phodišo e lego. Modiredi yo mongwe le yo mongwe o swanetše go ba le yona, yo mongwe le yo mongwe, le a bona, o swanetše go ba le mpho ya phodišo. Maatla ao a go fodišago a ka gare ga gago, Moya wo Mokgethwa, o no swanela go O dumelela go šoma tsela ya Wona. Yeo ke phetho.

¹⁸⁶ Go no swana le bophelo bjo bo lego ka mohlareng. Ga wa swanela go tšhela diapola ka mohlareng, go o dira gore o enywe diapola. O no bjalwa ka mobung, gomme o a nwa gomme o kgoromeletša ntle.

¹⁸⁷ Gabotse, yeo ke tsela ye o dirago Moya wo Mokgethwa. O ka gare ga gago. O no nwa go tšwa go mothopo wo o sa lapišegego wa Jesu Kriste, gomme O kgoromeletša dikenya tša Moya ntle. O a bona?

¹⁸⁸ Bjale ke eme fa, ke sa go tsebe. Modimo o tseba seo. O mosetsebje wa go felela.

¹⁸⁹ Bjale ge ke ile le go bea diatla godimo ga gago, le go re, “Kgaetšedi, o ya go fola.” O ka kgona go dumela seo, gomme seo se tla ba gabotse. Eupša bjale go ka reng ge A etla . . . Le a bona, ao e bile matšatši a a fetilego, morago ka matšatsing a Pentecostal.

¹⁹⁰ Re phela pele ga yeo bjale. Re ka godimo ga Pentecost, go swana le ge re le Methodist le Lutheran. Re godimodimo go go tleng ga Morena, moo bodiredi bjo Jesu Kriste a bo dirilego, Yenamong, bo swanetše go ba tlwa. Boka letlapahlogo godimo ga phiramiti, le swanetše go sesefala kudu go fihla letlapa le lengwe le le lengwe le lekanelka phethagalo. Gomme kereke e swanetše go tsena ka leemong leo go amogela Letlapahlogo, morago go tšeela selo ka moka ka tsogong, ge Mmele o tsošwa.

¹⁹¹ A o dumela seo? A o dumela dilo tše tšeо ke go botšago ke therešo? O a dira? Ge Morena Jesu a ka mpotša se sengwe seo o se dirilego, se sengwe seo o bego o se wa swanelo go be o se dirile, se sengwe seo se fošagetšego ka wena, goba e ka ba eng se ka bago, tša ditšelete, tša lapa, ga ke tsebe; e ka ba eng e lego, o tla ntumela, a o tla dira, go ba mohlanka wa Gagwe?

¹⁹² O Mokriste. O a bona, ke boletše le wena go no hwetša moya wa gago. O a bona, yeo ke tsela ye A e dirilego sedibeng; O rile, "Ntlišetše seno." O Mokriste. O modumedi. Yeo ke nnete. E sego mokgopelalifiti; modumedi! Go lokile. Bothata bja gago, bothata bogolo bja gago, bo ka molaleng wa gago. Ka morago ga molala wa gago, o na le sehloga, gomme sehloga seo se go fa kgatelelo. Se senya mahlo a gago, le go ya pele. A yeo ke nnete? Yeo ke O RIALÓ MORENA. Yeo ke nnete. Ge o ka e dumela, se tla tloga. Modimo a go šegofatše. Sepela bjale.

¹⁹³ Go bjang, mohlomphegi? Ga ke go tsebe. Re basetsebane seng sa rena. Jesu Kriste o a swana maab- . . . lehono, le go ya go ile. Ge nka kgona go ithekga ditho nnamong, go lekanelo bjalo gore Moya wo Mokgethwa o kgone go šomiša dipounama tša ka le mahlo a ka, feela boka . . .

¹⁹⁴ A o kile wa lora toro? Nnete. Go na le ye nngwe—ye nngwe karolo ya gago, o swanetše go se šome ka go dikwi tša gago tše tlhano. O na le—o na le letsvalo le letsvalofase. Letsvalo la gago la pele le fa, gomme letsvalofase la gago le godimo fa. O swanetše go se šome ka go dikwi tša gago tše tlhano, go ya godimo fa go lora; eupša ge o etla morago, go kgahliša le go fihla o elelwa se o lorilego ka sona.

¹⁹⁵ Bjale, baboni, baprofeta, letsvalofase la bona ga le godimo kua; le thwi fa. Ga o tšwele ka ntle ga dikwi tše tlhano tša gago; o a ema, o eme, o a lora. Gomme o be o tla re toro. . . . Ke be ke tla re, "Ntorele toro." O be o ka se kgone go e dira. Ebile le nna nka se kgone go go bonela pono. Go tše Modimo go dira seo. Eupša, ga ke ye go robala go e bona, ke ema mo le go e bona. Yeo ke mpho ya Modimo. Ge nka kgona go tloša letsvalo la pele tseleng, Modimo o tla šomiša letsvalo le lengwe ge A na le e ka ba eng go bolela. Go tšwa go Yena.

¹⁹⁶ Eupša ge nka kgona ka thušo ya Modimo. . . . Ge Jesu a ka be a eme fa a apere sutu ye yeo A mphilego, ge o babja O be a ka se kgone go go fodiša; aowa, O šetše a dirilego seo ge A ehwa. Eupša ga ke tsebe se o lego fa bakeng sa sona. O no ba monna. Re tikologong, kgauswi mengwaga ya go swana, gomme re nno—re nno ema fa mo sefaleng, re kopana lekga la mathomo. A o a dumela gore Modimo a ka kgona go utolla go nna ditlhologelo tša gago, goba se o se dirilego, goba dišiši tša gago? Ge A ka kgona go go botša se se bilego, A ka kgona go go botša se se tla bago. A o dumela seo?

¹⁹⁷ Ga ke nyake go tsea nako ye ntši kudu, eupša ke rerile thata gomme le swanetše go . . . nako, go tšhoga, o swanetše ka kgonthe go thekga ditho, gobane ga se gona nkago go se dira ntle le ge A mpontšha.

¹⁹⁸ Ee, Sona sese, Seetša se tla godimo ga monna. Go lokile, mohlomphegi. Aowa, mohlomphegi, ga o mo bakeng sa gagomong, o mo bakeng sa yo mongwe gape, gomme yoo ke morwedi. Gomme morwedi yola o dula ka California, gomme o bile le kotsi ya sefatanaga, nako ye nngwe ya go feta. Gomme o a nnyaka . . . O eme, go nna go mo rapelela, gobane o sa tlaišega ka yona. Gomme, theetša, a nke ke go botše se sengwe, kotsi yela ya sefatanaga e be e se ka California. E be e le ka Dallas, Texas, moo kotsi ya sefatanaga e diregilego. A yeo ke nnete? O ya go fola. O se lebale, ke mmona a sepela. Go lokile, dumela. Sepela gomme o dumele bjale, ngwanešu. Modimo a go šegofatše.

¹⁹⁹ O dira bjang, mohumagadi? Ke nna mosetsebje go wena. Ga re tsebane seng. Re basetsebane ka go phethagala. A o . . . o a dumela Jesu Kriste o a swana maabane, lehono, le go ya go ile? A o a Mo dumela? Bjale ge Moya wo Mokgethwa o ka mpotša se sengwe ka wena, seo o tsebago ga ke se tsebe, gona seo se tla go dira o dumele, a se ka se ke? Wena o . . . o na le ditlhakahlakano. O na le dilo tše ntši, eupša, se selo segolo sa gago se lego, o kgaušwi le go lebanya karo ka baka la sešo, gomme sešo seo se ka lehlakoreng la gago. Yeo ke nnete. Yeo ke nnete. Seo ke se o lego fa go rapelewa. Ge nka kgona go go botša leina la gago ke eng, a o tla ntumela go ba moprofeta wa Gagwe, goba go dumela gore e tla ba nnete? Mohumagatšana Holman, eya pele ka tsela ya gago, o thakgetše. O a bona? Modimo a go šegofatše. Dumela bjale. O se belaele.

²⁰⁰ O dira bjang, mohumagadi? Basetsebane yo motee go yo mongwe. O yo moswana go feta nna, feela mosadi le monna.

²⁰¹ Feel a nakwana, yo mongwe le yo mongwe tlhomphokgolo ka kgonthe. Moya wa Morena o tlogile fa.

²⁰² Monna yo a dutšego *fa*, a rwelego digalase, o na le bothata bja semoya ka monaganong wa gago. Ga o tsebe o dire eng. O hlakahlakane gohle. O a dumela, gomme o tla tšwela ntle gabotse. Ee, mohlomphegi. O tla dira seo? Go lokile.

Ebang tlhomphokgolo bjale.

²⁰³ Mohumagadi yo monnyane šo, o dutše thwi ka *fa*, o lebega ka mokgwa *wo*, ka diatla tša gagwe, o a rapela. O na le seatla se sebe se a se rapedišago. Ge o ka dumela, ee, Modimo o tla se dira se fole. Ga ke go tsebe, ga o ntsebe, eupša o kgwathile Sengwe. Ga se wa tsoge wa nkgwatha; o dikgato tše masomepedi go tloga go nna. Jesu Kriste o a go fodiša. Tumelo ya gago e go dira o thakgafale.

²⁰⁴ Ge yoo e se Jesu yo a swanago, Moprista yo Mogolo, yo a kgonago go kgwathwa ke dikwi tša mefokolo ya rena! A ga le dumele seo go ba bjalo?

²⁰⁵ Ntshwareleng, ke no swanelo go latela tsela ye Seo se yago.

²⁰⁶ Ke ba go fokola bjale, le a bona, feela o tee... Le a tseba, Morena wa rena, mosadi o kgwathile kobo ya Gagwe nako ye nngwe gomme O rile...

²⁰⁷ Ntshwarele, mohumagadi yo wa lekhilate a dutšego fa, a rapela; bothata bja sabohloko, kgatelelo ya madi ya godimo. Dumela, mohumagadi, e tla go tlogela. Amene.

²⁰⁸ Ke lebeletše, go be go le mohumagadi wa lekhilate a eme fa, le a bona, tumelo ya gagwe e Se gogile gonabjale. Amene.

²⁰⁹ Mohumagadi yola thwi ka morago ga gagwe, ka asma. Ge o ka dumela gore Modimo o tla go dira o fole ka asma yeo, o ka kgonago ba le yona, le wena, ge o ka e dumela.

²¹⁰ O na le tlhologelo ye kgolo ka pelong ya gago, gomme yeo ke—ke tlhologelo ya maleba. O nyaka lesea. Gomme lebaka o ka se kgone go ba le lona, o na le bothata bja sesadi. Gomme yeo ke therešo. [Kgaetšedi o re, “Seo ke se ke se beilego godimo ga karata.”—Mor.] Go lokile, a o a dumela bjale gore o tla... gore Modimo o tla go fa lona? [“Ee. Yeo ke nnete.”] Ge Morena Jesu a ka mpotša ke wena mang, a o tla dumela? [“Ee.”] Mdi. Lambert. [“Yeo ke nnete.”] Bjale o a ya, e dumele. A seo se go dira o dumele? [“Amene.”] A nke a le amogele, Modimo, Leineng la Jesu Kriste.

Eba le tumelo!

²¹¹ Mohlomphegi, re basetsebane seng sa rena, eupša Modimo o a re tseba bobedi. A o a dumela gore Morena Jesu o tla nkutollela mathata a gago? O a dira. Ga o tšwe mo. Ga o tšwe Arizona. O tšwa kgole bohlabela: Michigan. Yeo ke therešo. Therešo. O na le kgatelelo ya godimo ya madi, go thatafala ga ditšhikakgolo, bothata go kwa. Bo go tlogetše. Eya morago Michigan, Morena Jesu o go dira o fole.

Eba le tumelo ka go Modimo!

²¹² Mohumagadi a dutšego ntle mo, o rapediša tatagwe. O na le bolwetši bja Parkinson. Gomme... Ke a mmona bjale, gomme o apešitšwe ke moriti. E sego feela o apešitšwe ke moriti go iša lehung, eupša go ya lehung la Gosafelego, gobane ga se a phološwa. Yeo ke therešo. A o a dumela gore Modimo o tla mo phološa le go mo fodiša? Ge o na le tumelo go lekanelo go kgwatha Jesu Kriste, Moprista yo Mogolo wa rena, ka mnete o ka kgonago go amogela seo.

²¹³ Bjale a o ka ntirela monyetla? Bea seatla sa gago godimo ga mosadi yoo kgauswi le wena. O rapediša ngwanabo. Ya. Ngwanešu yola o a babja, gomme gape ke segatamoroko. Yeo ke therešo. E no dumela, o tla tlogela go nwa gomme a fola.

“Ge o ka kgona go dumela, dilo tšohle di a kgonega!”

²¹⁴ Mohumagadi a dutšego fa, a rapelago, thwi fa ka pele ga ka, o ne hlogo ya gagwe fase. Nka kgona go go botša, o a rapela, “Morena, a nke e be nna.” Mohumagadi o... O rapediša mogwera, gomme mogwera yola o ka sepetlele mo, o hwa ka kankere; le bakeng sa yenamong, gape. O ya go e foša. Mdi. Kelly, ema ka maoto a gago gomme o amogele phodišo, Leineng la Jesu Kriste. Ga se ka ke ka bona mosadi, ka bophelong bja ka.

²¹⁵ A o a dumela gore Modimo o fodiša bothata bja pelo? A o a dumela gore O fodiša bja gago? Go lokile, gona nno sepelela pele, o re, “Ke a Go leboga, Morategi Modimo.”

²¹⁶ Go thata go wena go tsoga mo mosong, o thatafetše kudu ka atheraithisi yela. Go ka se be ka tsela yeo gosasa ge o ka no e dumela le go ya pele. Ee, mohlomphegi.

²¹⁷ Go lokile, mohlomphegi. O hloka tšhelelo ya madi go tšwa Khalibari, e fodiša bolwetši bja swikiri le se sengwe le se sengwe. A o a dumela gore O dira seo? Go lokile, bja gago bo ka fodišwa, le wena, ge o ka no dumela ka pelo ya gago yohle.

²¹⁸ Etla mo. O tšhogile, seo ke se se hlotšego bothata bja gago. O na le mogodu wa alesa. A o a dumela gore Modimo o tla e fodiša? [Kgaetšedi o re, “Ee, ke a dira.”—Mor.] Ke nyaka go le bontšha se sengwe. Ke tla rola sešupanako sa ka feela motsotso. Go tšhoga, ke mohuta wo mothata, eupša o soulo ye botse. A nke ke be le seatla sa gago. Ke nyaka go tšea seatla sa gago. Ke nyaka o lebelele seatla sa ka. Bjale šetša, ke ya go bea seatla sa gago godimo ga sa ka. Bjale o a se bona, o bona tšona dilo di kitima go kgabaganya kua, yona boka meroromelo ye mennyan? [“Ee, ke a dira.”] Yeo ke alesa yela ya go phela. Bjale šetša, tloša seatla sa gago, bjale se boela morago sekeng. Bjale ke tla bea seatla sa ka godimo fale, ga se dire seo, a se a dira? [“Aowa.”] Eupša ke tla bea seatla sa gago godimo ga sona, šeo yona gape. O a bona? [“Ee.”] Bjale go na le se sengwe se swantšhago fao, seo gabotse o ka kgonago go se bona ka mahlo a gago mong. A yeo ke nnete? [“Ee. Amene.”] Phagamišetša seatla sa gago godimo gore batheeletši ba kgone go bona yeo ke therešo.

²¹⁹ Fa, batheeletši ba kgona go e bona. Bea seatla sa gago godimo fa. Bjale tloša seatla sa gago, mohumagadi. Bjale bea seatla sa gago morago godimo kua. Ke alesa ya go phela. Ke thišu, se sengwe se ja thišu. E hlotšwe go tšwa go letšhogo, e a phatlalala. O na le bothata bja sehumagadi, gape. Go lokile.

²²⁰ Bjale, fa, bjale ye ke ge o swanetše go tšea matsapa, feela gore mohumagadi yo a tsebe.

²²¹ Bjale ke nyaka batheeletši go swara dihlogo tša bona fase, le go rapela, gobane e tloga go yo motee go ya go yo mongwe. Ge o swanetše... Jesu o rile, “Leineng la Ka ba tla lelekela bodiabolo ntle.” Bjale swara hlogo ya gago e inamišitšwe ge o sa nyake alesa. Le a bona?

²²² Bjale fa ke nyaka o šetše. O na le alesa, bjale šetša seatla sa ka gomme o bone gore ga ke šuthiše seatla sa ka.

²²³ Tate wa Legodimong, a nke dikgaogelo tša Gago le mogau di be godimo ga mosadi, go mo dira a fole. O šeditše seatla sa ka. O šeditše, Tate, go bona ge eba go ne phetogo e ka ba efe. Gomme ke a tseba yeo, tumelo ya gagwe, go beng go tšhoga, ke a rapela, Modimo, gore O tla mo thuša. Leineng la Jesu, mo thuše.

²²⁴ Bjale, mohumagadi, ga ke ešo ka bula mahlo a ka, eupša mohumagadi o a tseba gore seatla sa ka se sa dutše feela bjalo ka ge se bile. A yeo ga se nnete, mohumagadi? [Kgaetšedi o re, “Ee, mohlomphegi.”—Mor.] Bjale se šetše sekgauswi ka kgontha bjale.

²²⁵ Kafao, se ga sa dirwa go dira pontšho. Se se dirwa go bega gore Jesu o boloka Lentšu la Gagwe. Bjale, O rile, “Leineng la Ka ba tla lelekela bodiabolo ntle.”

²²⁶ Bjale ke ya go swara seatla sa ka feela go iketla. Gomme ke nyaka o hlokomele, ga se tsela ye ke swarago seatla sa ka. O a bona, e fao nako yohle. O bona ka fao se kokomogago? [Kgaetšedi o re, “Ee.”—Mor.] Go befa kudu nako yohle [“Ee.”] gobane ke swere. Seatla sa ka ka moka se hwile bogatšu, go fihla sejabaneng sa ka. Bjale e no se šetša feela nakwana.

²²⁷ Morena Jesu, e sego bakeng sa pontšho (ga ra swanelo go dira seo), eupša gore Lentšu la Gago le ke le phethagatšwe. Wena ga se wa tsoge wa fodiša batho feela go laetša O be o le Modimo, eupša e be e le go phethagatša Lentšu. Gomme yeo ke tsela ye ke... gobaneng ke dira se bošegong bjo, Tate, ke tumelo ya ka go dumela gore mosadi yo wa go loka a ka kgona go fodišwa letimone le.

²²⁸ Sathané, ke a go laela, Leineng la Jesu Kriste, Yo a fentšego godimo ga bolwetsi bjhohle, gomme bo ka tlase ga maoto a Gagwe. Gomme bjalo ka mohlanka wa Gagwe, ke tsea matsapa. Leineng la Jesu, tlogela mosadi, etšwa go yena.

²²⁹ Bjale ga se ka šuthiše seatla sa ka. Mohumagadi o mpeela bohlatse. Se sengwe se diregile go seatla sa ka, a se be se se sa dira? [Kgaetšedi o re, “Ee, mohlomphegi.”—Mor.] Ge yeo e le nnete, e re, “Amene.” [“Ee. Amene.”] E ile, a ga se ya dira? [“Ee. Amene. E ile.”] O fodile. Bjale šole fale. Bjale lebelela fa. Ke beile seatla sa ka godimo, bjale bea seatla sa gago godimo, go no swana. [“Ee. Amene.”] O fodile. Eya pele, eya o je selalelo sa gago, Jesu Kriste o go dira o fole.

“Leineng la Ka ba tla lelekela bodiabolo ntle!” Ee.

²³⁰ A o a dumela, kgaetšedi? A o a dumela? A o a dumela gore Modimo a ka kgona go tloša seemo sela sa asma go wena le go go dira o fole? Go lokile, eya pele tseleng ya gago, o re, “Ke a Go leboga, Morena Jesu. Ke a Go dumela, ka pelo ya ka yohle.”

²³¹ Go bjang, mohlomphegi? Pelo e be e go tshwenya, mohuta wa go thibega o hlotšwe go tšwa go letšhogo; diponto, diponto tša go hlatlagana, e tee ka . . . tše pedi ka lehlakoreng le tee, gomme e tee ka go le lengwe. Go lokile, mohlomphegi, e a ema bjale. Eya pele. Tumelo ya gago e go dira o thakgafale, mohlomphegi. Sepela, o dumela ka pelo ya gago yohle. Go lokile.

²³² Mogodu wo mongwe, wo mobe. A o a dumela gore Jesu o go dira o fole? E no ya, o re, “Ke a Go leboga, Morena Jesu.” E dumele. Ge A ka kgona go go botša se o lego sona, ka nnete A ka kgona go go fodiša.

²³³ Go ka reng ge ke be ke se ka bolela lentšu le tee go wena, ke nno bea diatla godimo ga gago, a o be o tla dumela gore o fodile, o dutšego fale ka setulong? A o be o tla dira? Eya pele tseleng ya gago, o re, “Ke a Go leboga, Morena.” Ke se o se dumelago.

²³⁴ Etla. A o a dumela gore Modimo o fodišitše bothata bjola bja mokokotlo, o dutšego fale gonabjale? Go lokile, o ka ya pele, wa re, “Ke a Go leboga, Morena.” Dumela ka pelo ya gago yohle. Eya pele gomme o dumele.

²³⁵ Mohlomphegi, ge Modimo a sa go fodiše, letšatši le lengwe o ya go golofala, ka mokgwa *wo*, ka lepara, o sepela mmogo ka atheraitisi yela. Gobaneng o sa Mo amogele gonabjale? A o a e dumela? Eya pele tseleng ya gago, gomme o re, “Ke a Go leboga, Morena.” Gomme o kiba selo, gomme o ye thwi tseleng ya gago, o hlalala.

²³⁶ Jesu o fodiša mokokotlo wa gago le go go dira o fole. A o dumela seo? Go lokile, eya pele tseleng ya gago, o re, “Ke a Go leboga, Morategi Modimo.”

²³⁷ Etla mo, mohumagadi. Bjale o boifa eng? Lebaka le o boifago, ke nako ya menophose bakeng sa gago. O tseba se ke se rago, phetogo ya mohumagadi. Gomme se sengwe le se sengwe, sa thari mantšiboa, o a lapa. Ga o kgone go dira mošomo wa gago, o lapa kudu. A yeo ga se nnete? [Kgaetšedi o re, “Yeo ke therešo.”—Mor.] Go lokile. Go lokile bjale. Eya pele, tumelo ya gago e go dira o fole.

²³⁸ Yo mongwe, go tšhoga, eupša o be o tšhogile bophelo bjohle bja gago, o bile go tšhoga gannyane ge o be o le yo moswana. O be o le yo monnyane wa matšato o eya go dikologa. Eupša bjale go lebega o ka re se sengwe se no go swara. O gateletšwe nako yohle. A yeo ga se nnete? E ka se sa ba gona, ge o ka ntumela gonabjale bjalo ka moprofeta wa Modimo. Eya gomme o dumele.

²³⁹ Ke ba bakae ntle fao le dumelago ka pelo ya lena yohle? Beang diatla tša lena godimo ga lena seng. Leineng la Jesu Kriste wa Nasaretha, ke laela monna le mosadi yo mongwe le yo mongwe mo go bea diatla tša lena yo motee godimo ga yo mongwe.

²⁴⁰ Ge Lentšu la Modimo, karolo ya Lona e le nnete, Lona lohle ke nnete. Jesu Kriste o rile, “Ka—ka Leina la Ka ba tla lelekela bodiabolo ntle.” “Lentšu la Modimo ke Mohlathi wa dikgopololo maikemišetšo a pelo.”

²⁴¹ Jesu o rile, “Ge ba Bea diatla tša bona godimo ga balwetši, ba tla welwa ke maruru.” Modumedi yo mongwe le yo mongwe ka mo, e re, “Amene,” go seo. [Phuthego e re, “Amene.”—Mor.] Gona, le badumedi, o rapelela yo o nago le tša gago... O rapelela yo motee yo a nago le diatla tša bona godimo ga gago, ka gore ba a go rapelela. A re rape leng mmogo le go fenza lenaba, gomme a nke motho yo mongwe le yo mongwe a babjago ka fa a fodišwe, ka Bogoneng bja Jesu Kriste.

²⁴² Ramaatlakamoka Modimo, Mothomi wa Bophelo, Mofi wa dimpho tšohle tše botse, romela ditšhegofatšo tša Gago godimo ga batho ba.

²⁴³ Sathane, o lahlegetšwe ke ntwa. Jesu Kriste o fa. O a swana maabane, lehono, le go ya go ile. Bakriste ba ne diatla tša bona godimo ga bona seng. Ba rapela thapelo ya tumelo.

²⁴⁴ O rile, “Maswao a a tla latela bona ba ba dumelago.” Yo mongwe le yo mongwe wa bona o rile, “Amene,” ba a dumela. Ba feleleditše tlhologelo ya pelo ya Gago, ge O rile, “Maswao a a tla latela bona ba ba dumelago.” Ba beana diatla seng sa bona.

²⁴⁵ O fentšwe, Sathane. Etšwa go bona, Leineng la Jesu Kriste. Tlogela lefelo le gomme o tlogele moago wo, Leineng la Jesu Kriste.

²⁴⁶ Monna le mosadi yo mongwe le yo mongwe yoo a dumelago gore modumedi o ne diatla tša gagwe go wena, thapelo ya tumelo e rapetšwe, gomme o komana go tlogela bolwetši bja gago, go tlogela dikgopololo tša gago ka bjona, le go amogela Lentšu la Modimo go ya ka pelong ya gago, ema ka maoto a gago gomme o amogele phodiso ya gago, Leineng la Jesu Kriste. Amene le amene! Phagamišang diatla tša lena bjale gomme le Mo fe tumišo, ka gore go fedile. 

**64-0122 Go Lebelela Go Jesu
Ramada Inn
Phoenix, Arizona U.S.A.**

NORTH SOTHO

©2024 VGR, ALL RIGHTS RESERVED

**VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org**

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org